

東
華
續
錄

東華續錄

同治九

臣王先謙敬編

臣張式恭恭校

五月上旬朔署江蘇巡撫李鴻章奏官軍自克復嘉定後約會華爾及英法各軍直抵青浦縣城四月十四日官軍環攻各門英法各兵並用大礮轟塌西南城牆十餘丈卽由西門登城華爾督勇繼之羣賊驚亂我軍一擁而上殺賊甚多餘逆奪門衝出中外兵勇痛加截殺陣斬悍賊千餘名生擒三千餘名救出被擄男婦三千餘人當將青浦縣城克復其附近數十里賊蹤掃除淨盡見暫派常勝軍在城駐守參將李恆嵩紮營兩岸以堵蘇州援賊副將銜華爾屢著戰功擬請以副將補用其餘在事協剿員弁兵勇可否擇尤彙案請獎 上諭內閣李鴻章奏查明克復青浦縣城詳

細情形一摺此次英法兩國提督會同官軍克復縣城實屬誠悃可嘉著該撫傳旨褒獎副將銜華爾著以副將補用其餘在事出力員弁著李鴻章擇尤保奏○李鴻章奏疊奉諭旨令臣移紮鎮江安籌兼顧臣於三月初十日抵滬續到兵勇其計五千餘人見尚有楚勇兩營未至屢接督臣曾國藩來函以兵勇訓練未熟目下斷不宜出仗臣親駐營盤督率操練未敢稍懈十五日接受撫篆後卽派所部四千人進紮南匯縣之周浦鎮分南北兩路相機攻剿如浦東廳縣肅清當駐重兵於金山衛以堵浙省踞賊東竄之路惟松滬水陸各軍紀律不明若逐加挑汰更換將領束以楚軍規制必須數月乃有眉目署臬司劉帥膏樸實廉正深得民心見委辦臣軍營務藉資練習亦須數月後察看能否接辦臣在上海未必卽有化弱爲強之效臣往鎮江亦未必無一傳眾咻之虞

但臣職分所在不敢畏難當遵旨詳加簡閱悉心選汰如能將上海各軍整理就緒付託有人然後由江周歷北岸以達於鎮可無內顧之憂容臣隨時察度奏明辦理頃據喬松年稟報竄揚之賊已向西北撤退如果鎮揚再警臣卽酌撥水師數營於裏下河各口以固江防若臣移紮鎮江則當會同都興阿互相援應合力掃蕩上諭議政王軍機大臣等李鴻章所稱甬抵滬上因兵勇訓練未齊松滬各軍尙待整頓未能卽赴鎮江自係爲慎重起見滬上固係餉源所出見在已將附近一帶地方攻復似目前尙可無虞惟鎮江爲南北關鍵自古用兵必爭之地見在北岸均已肅清急宜以重兵駐紮於此爲進規江甯之計著曾國藩迅卽會商李鴻章酌量情形通籌全局帶兵及早到鎮先占形勝華爾此次已照請以副將補用此後若續有功績如何辦理該署撫諒已熟籌

薛煥於辦理軍務實非所長尙能力持大體該署撫於遇有外國事件仍當籌商會奏此次攻克青浦各處關涉洋人薛煥未曾會銜有無意見未洽儻薛煥有辦理未協之處卽著據實具奏候旨遵行將此由六百里諭令知之○諭李鴻章奏已革道員張景渠署甯波府知府林鈞由定海縣率領廣艇攻復鎮海縣城進攻甯波外國兵船同開大礮轟入城內當將甯波府城克復等語上年甯波郡城失陷傳聞逆匪旋即退竄此次張景渠等有無會同外國兵船攻剿之事著左宗棠薛煥李鴻章等將克復郡城詳細情形查明據實具奏甯波鎮海業經收復亟宜得人而理著曾國藩左宗棠迅卽遴派賢能員弁酌帶水陸官兵由閩航海前赴甯波郡城督辦防務至道員張景渠前在甯波潰退間有雇覓輪船裝銀二百萬兩運赴定海之事節經諭令曾國藩左宗棠鞫嚴審

如果屬實該員情罪重大斷不准藉收復鎮海等處爲詞希冀開復著曾國藩左宗棠等仍遵前旨查拏究辦毋稍輕縱將此由六百里各諭令知之○癸未勝保奏洛陽爲天下之中山陝實上游重地見在竄洛捻匪業已回竄粵逆則由武關闌入攻破山南等縣全陝震動臣若親督全軍經理西北當可力顧完善惟刻下皖事已辦有頭緒如果接辦得人臣原可先顧西北無如臣見在所處有不能遽然舍去者查歷年淮北之患首在捻匪而捻匪之畏苗練甚於官軍苗沛霖先復潁上繼紮江口殺捻極多其不與捻合可知見復生擒陳逆是撫苗已有成效自應循照辦理以全大局無如李續宜成見太重臣與籌商軍事函牘概置不答且徧貼告示聲言剿苗以致淮北數百里已定之人心又形惶惑又臣拏獲奸細搜出惡黨吉學盛與捻匪王老鼇密書內有楚軍暗結張

落刑以攻苗練等語尤深駭異查刻下情形不慮苗練之不就範
圍但慮楚軍之恃強妄作儻曲直不分功過不辨皖練之激而成
變者將不止一人恐臣一離此邦卽有決裂之患應請飭下李續
宜卽來潁與臣會商一切臣所辦已成之局不准該撫以意更改
苗沛霖旣帶罪立功如蒙恩賞還原官則自新有路必將鼓舞奮
興不至遂生他變臣卽將皖事交該撫接辦剋日整理西行俟秦
豫又安臣再折回淮北始終其事或特簡大員倣照通商大臣之
例專辦撫苗勦捻事宜他人不能過問但使苗肯盡力捻匪必不
難平第恐李續宜偏恃己見意存掣肘臣擬將苗營各練均改爲
欽差營練名目卽派苗沛霖兼理大營營務處帶練殺賊聽候調
遣並請旨責成僧格林沁就近經理此事督同勦捻立功該撫不
必與聞如皆窒礙難行惟求另簡賢能授以皖撫臣有所交代庶

可抽身西行或加李續宜以部院虛銜仍令自成一軍責以勦賊
自效 上諭議政王軍機大臣等前據勝保奏擒首邢冠軍爲張
落刑羽翼接濟賊糧抗拒官軍復助虐攻陷穗子鋪截我大兵糧
道情罪難寬見飭黃得魁等晝夜圍攻生擒邢冠軍並老捻多名
仍令兵勇合力環攻以期聚而殲旃當以該大臣認真勦辦不少
寬縱從此埽蕩擒巢可期廓清皖境茲據奏邢圩自邢萬軍卽邢
冠軍被擒後賊氣已奪邢萬軍之父邢正舉及圩內良民稟請歸
正勝保卽親赴該圩逆眾匍匐請命當將邢萬軍之父邢正舉及
其子邢慶蘭押赴軍營爲質一面飭令邢萬軍隨軍助勦以贖前
罪等語勝保辦理此事忽嚴忽寬前後如出兩人殊不可解邢冠
軍素爲張逆羽翼若飭令隨同勦擒該逆狼子野心難保不故智
復萌潛通爲患邢冠軍及其父邢正舉其子邢慶蘭等均著卽行

正法悍賊王浩然餘黨數十人著一併明正典刑勿畱餘孽圩內如果有寄居良民仍著分別省釋至所稱撫苗已有成效無如李續宜成見太重已寄諭李續宜據實具奏矣苗沛霖縛送陳逆業准其免罪自新如果督率練眾隨同官軍直擣蒙亳老巢將張落刑擒賊自當再予恩施若仍首鼠兩端意存反覆李續宜身爲皖撫豈得以業經招撫遂置不問至勝保所稱特簡大員假以事權倣照通商大臣之例責令專辦撫苗勦捻事宜並請將苗練改爲欽差營練名目等語苗沛霖不過一鄉間練總豈得以外國爲比儼樹一敵所奏著不准行至所請另簡賢能授以皖撫似藉以取悅苗練尤屬非是竄陝股匪見在藍田渭南交界處所前諭該大臣酌派兵勇三千名仍著揀派得力大員統帶前往交孔廣順調遣以資得力將此由六百里諭令知之○諭寄諭安徽巡撫李續

宜據勝保奏稱李續宜成見太重與之籌商軍事函牘概置不答
徧貼告示聲言剿苗以致淮北數百里已定之人心又形惶惑並
拏獲奸細吉學盛與捻匪王老鼃密書內言楚軍暗結張落刑以
攻苗練之事僅該大臣整旅西行請特簡大臣專辦撫苗剿捻事
宜他人不得過問等語所論甚屬偏執已寄諭勝保嚴加訓飭矣
苗練叛逆之罪本應痛剿第其擒獻陳逆似有畏懼之意予以免
罪冀其自新若借助順之名陰行叛逆之計非獨僅予免罪不能
因此置之不問卽開復原官後亦豈能容其肆行無忌該撫身任
皖疆於苗沛霖後來之向背順逆亦當待以平心隨時酌辦總不
當豫存成見張落刑逆迹昭著何以楚軍有句結剿苗之舉是否
實有其事卽著據實具奏該撫於抵潁後將該處情形並勝保辦
理是否妥協之處迅速密陳剿辦捻匪應如何次第辦理並著妥

籌具奏朝廷一秉大公毫無成見若因勝保身爲統帥意多遷就不據實陳奏轉失委任之意將此由六百里密諭知之○諭鄭元善奏移紮汝甯督軍南剿遵飭楊飛熊由河陝迎擊雒南粵匪各摺片豫省閩鄉盧氏一帶毗連秦中雒南等處該撫令楊飛熊扼截西北要隘自係力籌屏蔽惟陝兵單薄待援孔亟官文等已飭何紹彩一軍赴鄖陽相機進剿著鄭元善迅速探明楚軍如已入陝楊飛熊一軍即可扼守西北以斷竄賊往來之路斷不可任賊闖入晉省如楚軍尚未入陝則事機甚緊卽著飭令楊飛熊星速入陝勿徒以扼要爲詞致同株守其豫省西北要隘卽須另揀勁兵扼紮正在寄諭間據托明阿等馳奏山陽被陷賊勢猖獗著鄭元善嚴催楊飛熊趕緊督帶所部迅赴西安會剿毋稍稽遲將此由六百里加緊諭令知之○諭本日據托明阿等奏稱商州棣花

鎮之賊分竄雒南山陽雒南雖已解圍山陽城池被陷請飭催楚豫援兵等語山陽與鄖陽連界若何紹彩所部就近進剿最爲近便卽著官文等催令前往毋許遲誤多隆阿自克復廬郡後淮南無事可辦著酌帶所部迅速馳赴陝省督辦軍務總兵雷正綰見在該將軍營中卽著帶同前往其餘畱皖兵勇卽咨李續宜統帶漢中竄匪未滅而兵勇頗多前據瑛棨等奏保曹樹鍾督辦該撫巧滑性成豈能勝此重任著駱秉章迅催毛震壽帶兵前赴漢中總統諸軍迅掃賊氛毋再延緩諒該大臣等公忠素著必能權衡緩急用慰西顧之憂將此由六百里加緊各諭令知之○李鴻章奏上海近日軍情經前撫臣薛煥派知府李慶琛帶隊往攻太倉州進紮城東板橋地方踞賊死守不出逆首李秀城調賊眾十餘萬於四月十九日分援太倉鈔襲李慶琛各營後路該軍猝被攻

陷傷亡甚多知府李慶琛副將王國安梁安邦同知周士濂均無下落二十日該逆連撲寶山縣城經參將姜德督勇擊退嘉定青浦各防同時告警臣已分派兵勇前往協守如西路再警卽將派往浦東之湘淮勇四千調回援剿報聞○予安徽陣亡參領巴凌阿知州張杏林等祭葬世職○甲申雨○勝保奏竄陝之匪爲粵逆僞扶王陳得才向稱兇悍且所帶土工皆善挖地道意在攻陷城池若不亟圖補救其患不可勝言見調鄖陽襄樊等處援兵能否趕到尙未可知楊飛熊一軍一時恐難到陝該逆已連陷廳縣西安腹背受敵若無大隊援兵剋期速至全局恐難挽回查多隆阿統帶楚師勤勞屢著今距壽州不遠若令星夜赴陝自必較有把握而沿江南下之兵有鮑超彭玉麟楊載福等衝其鋒有曾國藩李續宜等督其後兵力亦不爲不多斷不至因此掣肘應請飭

下該將軍迅速通行實於西北大局有裨臣見正督飭官兵苗練進搗蒙臺捻巢勢不能遽撤全軍若分兵前往亦屬無濟於事見擬以五月爲期極力籌辦皖捻如果此間功成八九而陝賊仍張臣當統率全軍馳往督辦卽以多隆阿爲臣幫辦分擊合剿不患無成此時先其所急請飭該將軍星夜帶兵速赴陝省實爲目前要務又奏接瑛榮來函告急屬臣早赴秦中以殄寇氛臣見進剿捻巢正在得手之時若移兵而西機會實覺可惜且臣一離皖疆苗練與楚軍必致相左又成意外之虞不得已抽派兵勇二千餘名卽日令副都統祥恩管帶前往半紮正陽半駐壽城以資鎮撫近來楚軍所向有功然爭功太甚成見太深非楚人不官非楚兵不用未免互相標榜聖明在上當必有以折衷至當而不至有偏信之失也見在廬郡已克曾國藩似宜督軍進抵和州李續宜

當進紮安慶以爲曾國藩後路聲援而淮北一帶勦撫機宜臣不敢談之於人而又不可爲所牽制似應另簡大員率領潁軍事司其事一切重大事件與臣商榷決裁則臣酌奪緩急卽暫離皖疆三兩月仍可循照舊規不至使已成之局另生枝節查賈臻才具本優地方情形尤爲熟悉若蒙天恩卽命辦理長淮以北勦撫事務大臣仍歸臣營節制於馭苗勦擒當可相宜上諭議政王軍機大臣等陝西軍情緊急昨已命多隆阿迅速援陝該大臣督飭官兵苗練進擣蒙毫老巢軍事正在喫緊若移軍而西恐擒勢再張愈難著手該大臣見旣駐師淮潁當以馭苗勦擒爲己任必須始終其事計出萬全所請以賈臻辦理長淮以北勦撫事務著毋庸議所稱以五月爲期籌辦皖捻該大臣總當存受降如受敵之心斷不可希圖了事率行收撫仍貽後患至楚軍頻年進剿所

向有功李績宜雖有成見該大臣惟當破除積習與之和衷辦理
封疆大臣出自朝廷特簡斷不能輕易更調昨降諭旨甚明該大
臣當敬謹懍遵勿事曉瀆潼關協副將黃鳴鐸前署壽春鎮與苗
沛霖不洽爲苗練所拘該練旣已就撫黃鳴鐸係朝廷命官諒已
放回該員見在何處向來奏報何以絕未提及卽著勝保查明據
實速奏其余安定信茂林二名摺報內亦未經提及辦法務須遵
照前旨辦理不可含胡援陝之兵旣據奏稱一時未能分撥卽著
酌度辦理將此由六百里加緊諭令知之○命前任雲貴總督吳
振械馳赴山西協同巡撫英桂辦理防剿事務○乙酉諭議政王
軍機大臣等徐宗幹奏臺灣匪徒滋事見籌辦理情形一摺臺灣
彰化縣匪徒戴萬生等聚眾滋事前經慶端馳奏當卽寄諭該督
撫等督飭文武實力進剿茲據徐宗幹奏與前情大略相同所稱

曾玉明在臺屢立戰功熟悉情形應令酌帶弁兵飛渡前往督辦
升任湖北漢黃德道洪毓琛爲臺民攀畱飛檄權署道篆以資熟
手等語所籌與前寄諭一切均相符合卽照所擬辦理臺地遠隔
重洋民情素來浮動見在彰化失守後各處匪徒乘機竊發風謠
四起自應乘其起事之初殲渠戮醜解散脅從該撫身任疆圉責
無旁貸著趕緊督飭曾玉明洪毓琛等文武兵勇實力辦理務令
起日戡事無致蔓延護提督石棟所請調回赴浙師船由鹿港登
岸堵截匪眾下竄並該撫所籌將雇募臺勇所餘經費儘數畱臺
支應餉需及由省局籌備接濟均著照議迅速妥辦閩省官方吏
治弊壞已極徐宗幹經朝廷特簡倚畀方殷於一切安民察吏務
當埽除積習次第認真整飭以副委任將此由五百里諭令知之
○丙戌賜徐郁等一百九十三人進士及第出身有差○諭議政

王軍機大臣等前據譚廷襄遮克敦布先後馳奏會匪董執信李標等帶領馬步千餘人勾結南捻自流通集過隄北竄至曹縣境韓集曹樓等處盤踞另股由東路出巢何家寨已見邊馬恐由蕭豐北竄當經諭令譚廷襄知照德楞額等實力堵剿西凌阿馬隊准其就近調遣並諭遮克敦布由東明過河繞赴曹郡迎頭截剿毋令遁入水套其濮范防河賁成王榕吉辦理惟數日以來未據譚廷襄等續有奏報風聞滕縣已見髮逆邊馬已至魚臺定陶連夜火光燭天係內應之賊同時並起曹單等縣紛紛告急直東防兵本單勝保招降之眾又未能安貼若加以南來捻逆則北路愈形喫重譚廷襄意存粉飾奏報每多敷衍僧格林沁統兵東豫距單縣甚近該處情形該大臣必有聞見如賊勢浩大卽迅速親統馬步全軍由間道繞出賊前與譚廷襄等所派之兵會合截剿以

固北路藩籬毋爲金樓一隅之匪所牽掣譚廷襄惟當實心勦辦
不得以僧格林沁督兵迎勦稍涉推諉儻有疏虞則該撫身任封
圻罪無可逭也將此由六百里各諭令知之○丁亥袁甲三奏江
南援賊經提督李世忠擊退後麤聚江邊各村莊希圖紮營再逞
該提督督調各軍乘勝追剿該逆排仗抗拒李世忠親督馬隊奮
勇直衝身入重地該逆層層包裹李世忠手刃悍賊七人躍馬而
出賊眾驚駭各隊兵勇一擁而上短兵相接逆勢不支適提督李
顯發等各隊趕到四面包鈔該逆無路可逃李世忠豎立投誠免
死大旗被脅之眾棄械乞命者三千餘人餘賊驚惶南竄我軍追
殺殲斃二千餘名生擒九百餘名李世忠先期知會江浦總兵李
顯爵豫備截擊李顯爵以精騎設伏於江浦東城地方攔路要截
盡斬無算賊奔江岸爭船搶渡撲河落水者尤多餘眾遁回九洑

洲老巢江北一律肅清見據該提督呈稱江北惟九洑洲未復該處緊逼大江與金陵賊巢對峙爲南北第一關鍵前因奏調水師不至以致賊股北渡來往自由全局幾爲搖動今雖將賊擊退若不設法攔截難保不去而復來爲今之計欲保江北必先圖九洑洲欲圖九洑洲必嚴扼江面以斷江南援賊等語見在上游水師已至烏江若下游礮船上駛聯爲一氣則九洑洲賊巢孤立無援不難掃除淨盡已飭李世忠迅速相機進剿並咨商曾國藩都興阿妥籌辦理 上諭內閣袁甲三奏官軍追剿援賊擒斬極多江北肅清一摺剿辦甚爲得力著卽飭該提督進攻九洑洲以靖江面所有此次出力文武員弁著准其彙入六合二次解圍案內擇尤保奏○諭議政王軍機大臣等袁甲三奏江北肅清並陳李世忠忠義出力各摺片此次江南逆賊圖援北岸經李世忠督軍追

殺賊匪均渡江南遁該提督見籌進攻九洲以固江北實屬忠
勇性成深堪嘉尚著卽飭令進攻九洲與各將弁同膺懋賞前
據曾國藩奏稱飭黃翼升統帶水師赴鎮諒必業已下駛卽著該
總兵於抵九洲時先將賊巢攻克再行赴鎮其下游礮船亦可
酌量調撥上駛以期厚集兵力並著都興阿督飭水陸各軍協同
攻剿庶李世忠之兵不至獨衝兇鋒而要隘易於攻克以固北岸
門戶該將軍務當和衷聯絡共奏膚功以慰廑念至英國人接濟
金陵賊糧各情著曾國藩一面飭知附近金陵一帶水路嚴防一
面由總理衙門設法曉諭阻止儻續有金陵賊情探報並著袁甲
三隨時具奏將此由六百里各諭令知之○以黃倬爲內閣學士
由詹事遷○戊子諭議政王軍機大臣等慶端奏遂昌全境肅清賊勢
趨重溫州抽隊援剿一摺松陽龍游江山各路逆匪復竄遂昌縣

治經總兵林文察參將林文明等分兩路直抵遂昌縣治破柵而入並分攻王村口踞賊殲斃甚多復將遁回松陽股匪撲滅遂昌全境肅清惟溫郡賊眾兵單防剿甚形喫重慶端見將遊擊李朝安所募臺勇調赴瑞安並由營抽調兵勇疾趨福甯兼由閩安抽派師船赴溫會剿著卽迅飭前往毋稍遲誤此時賊勢趨重溫郡閩省東北防務緊要該督身任兼圻責無旁貸務將溫郡及福甯一帶嚴密布置儻令賊蹤竄入閩疆惟該督是問松陽龍游均有巨股逆匪左宗棠正宜乘此機會痛加剿洗爲牽制溫匪竄閩之計林文察秦如虎皆勇敢善戰並著慶端妥爲調遣加以激勵飭令會兵夾攻以期一鼓殲除前據御史朱潮給事中鍾佩賢奏稱浙省諸暨縣農民包立身團練義勇殺賊爲逆匪所畏著左宗棠查訪情形如果該農民爲眾所服著卽妥爲駕馭勛以忠義爲將

來進攻浙東之助將此由六百里諭令知之○改置甘肅巴燕戎格等廳城官制營伍○己丑諭內閣劉長佑奏官紳克復太平府城乘勝進擣賊巢一摺廣西太平府城被逆匪吳淩雲等攻陷屯踞署左江道吳德徵等調派官紳分道進取勦撫兼施先後收復勞村等四十三村羅白土縣被脅各村均聞風歸順本年正月進勦江州屬之渠香村陣斬逆目陳六保斃賊數十名溺河死者無算小華等數十村均各求撫土思州一帶被陷地方次第收復二月十二三等日攻打壺關礮斃僞軍師謝輅貞城內逆匪大亂我軍由南門攻入斃匪數百名生擒數十名當將太平府城克復太郡失陷後漢土各屬悉淪於賊此次連復村寨數百處力拔堅城辦理甚爲得手著卽乘此聲威激勵將士擒渠掃穴以靖邊圉所有在事出力官紳著准其查明彙保毋許冒濫○官文曾國藩

多隆阿奏官軍克復廬州後逆匪向壽州一路逃竄四月十五日
臣多隆阿令溫德勒克西穆圖善等率馬隊官兵過河向吳山廟
一路跟蹤追剿過吳山廟二十里起及賊隊追殺三十餘里至雙
廟集賊列隊抗拒舒亮等率隊三路直前該逆死拒不退鏖戰二
時之久溫德勒克西等奮呼直上槍箭齊施逆眾紛紛敗潰十六
日官兵齊至瓦埠集復追殺二十餘里至余家埠該逆排列馬步
各隊拌命衝突溫德勒克西等率隊齊進賊眾由莊墓橋逃遁舒
亮等飛騎攔頭截殺該逆無路可竄撲河溺斃者約二千名生擒
二百餘名馬隊復追剿三十餘里至朱家集沿途約斃賊三千餘
名生擒六百餘名內穿黃衣賊三十餘名奪獲贏馬槍械無算其
吳山廟敗匪亦經雷正綰等分途按殺殲除淨盡查四眼狗陳玉
城自被我軍攻克堅城該逆率餘黨二萬奪路逃竄經官軍連日

追殺其斃賊匪一萬七八千名內黃衣賊目五十餘名生擒一千三百名逆勢已孤不難指日授首 上諭議政王軍機大臣等陳逆竄入壽城前據勝保奏經苗練擒獻已諭令在軍前正法諒已遵旨辦理前諭多隆阿率所部馳援陝西雷正綰赴陝安鎮本任督辦防剿見在陝匪竄陷渭南由華州華陰直逼潼關勢甚猖獗多隆阿著卽趕緊拔營率同雷正綰赴陝多隆阿部將如楊朝林趙旣發余福象並著酌量帶往以資調遣見在賊勢趨重潼關山西蒲州一帶尤爲喫重並著多隆阿選派一軍由蒲絳繞赴潼關扼守毋令該匪肆行竄擾總兵何紹彩仍著官文催令迅赴陝西何路最緊卽由何路期辦毋得遷延觀望致誤事機將此由六百里加緊各諭令知之○諭沈葆楨奏馳抵廣信並飭屬擇險築堡一摺江西廣信一郡毗連浙閩爲左宗棠入浙各軍後路該逆屢

圖竄擾以阻進剿之師見在皖南北諸軍連克堅城左宗棠復肅清江常進攻開化該逆被剿窮蹙難保不由浙閩之父回竄信郡以圖牽掣我師沈葆楨見行抵該郡著卽將修寨築堡各事宜妥爲布置務期有險可恃使賊入境無可擄掠惟堅壁清野之法在川陝著有成效江省地勢民情各異尤當因地制宜變通盡善使民不擾其地方官及派出之委員等務須擇其愜洽民心之員與該郡紳民妥爲辦理毋致藉端擾民以慰塵念將此由五百里諭令知之○諭劉長佑奏克復太平府城進剿隴羅老巢一摺太平府城久淪於賊雖經克復而隴羅未拔元惡吳淩雲未獲馱樸九岸亦未勦平相距府城均不甚遠且聞泗鎮各屬伏莽尙多亟應乘此軍威大振激勵各屬官紳壯練并力埽蕩該撫前奏親赴潯州埽除積匪此時計已抵潯該處與左江聲息相通著卽將登隴

橋潰匪及黃三散黨大加懲創既可以鎮服潯州新復未定之人
心卽可使太平等屬匪徒聞風畏懾飭令該文武等乘機勦撫俾
邊隅荒遠一律肅清修荔軍務易元泰等辦理如何前據毛鴻賓
奏恭城踞匪欲竄郴桂該撫所派由二塘蓮化墟進剿之軍並著
卽遵前旨飭令會合楚省官軍兜圍痛勦毋使蔓延近省地方緊
要蔣益澧之軍甫經移浙該撫尤當飭令張凱嵩就近督率妥籌
辦理將此由五百里諭令知之○諭田在田奏進攻高黃山寨賊
匪獲勝並西路捻股圍困宿州一摺據稱高黃山賊匪樵汲斷絕
早晚定可得手詎西捻李城等股傾巢齊出圍困宿城及符離營
寨其宿城十里外及西山前均築有賊壘多座復糾馬步萬餘繞
至符離以北之黃花洞等處我軍眾寡懸殊能否卽時擊退尙無
把握等語逆匪分股竄擾剽疾靡常田在田惟當就見有兵力分

路進攻力圖掃蕩毋得藉口兵單任令逆蹤紛竄見在廬州已復
皖省軍務較鬆著袁甲三迅撥勁旅前赴宿州一帶會合田在田
各軍實力剿洗爲一鼓殲除之計毋令該逆蔓延將此由六百里
各諭令知之○辛卯左宗棠奏逆首李侍賢於江山花園港敗遁
後臣軍追至常山該逆已由衢南回竄龍游今賊黨堅踞龍游縣
城及衢南之石室街並喉壽昌踞逆分竄衢州東北一帶修築堅
壘以抗追師而自率諸賊回竄金華府城老巢其另股由塘溪口
繞竄遂昌龍泉邊界者經官兵鄉團及總兵林文察截擊斃賊二
千餘名餘由松陽遁走遂昌龍泉兩縣肅清賊之大勢均趨重金
華而倚龍游壽昌蘭谿三縣賊巢爲犄角之勢臣本擬先剿衢北
之賊以攻龍游因接道員王文瑞等飛報首逆僞輔王楊輔青率
大股分由淳安縣之威坪梓潼源港口而來圖撲遂安以擾江南

而皖南自鮑超等連戰克捷收復城池後各處敗匪亦由甯國竄至前隊已抵遂安之界首東亭一帶賊館連紮四五十里臣以李侍賢甫經敗遁勢必不敢上竄楊輔青一股久圖越竄江皖遂安防兵單薄開遠一帶歧徑最多分駐馬金街之四營亦難徧行扼截遂令知府劉典率各營由華埠馬金以抵昏口臣率親兵及各營由常山進駐開化相機堵剿首逆楊輔青聞官軍大至乘夜遁逃王文端等派隊追剿沿途僅殺斃長髮老賊百數十人追至淳安縣城賊已奔竄昌化復向甯國竄去臣已咨皖南各軍嚴行戒備李逆之黨踞壽昌龍游者見臣軍已赴開遠一路日漸上竄衢郡南北又形喫緊臣卽由華埠出常山赴衢州劉典崔大光等營已陸續拔回俟玉山婺源德興各處購米解到卽裹糧而趨相機辦理上諭議政王軍機大臣等逆賊麇聚浙東圖竄江閩蓄志

已久衢郡爲江閩門戶左宗棠自應親往督勦以扼要區惟該撫所部本單而賊計詭譎堵此竄彼殊形勞苦甚爲廬念蔣益澧劉培元所部已報四月初間起程該撫卽派員迎提以厚兵力見在鮑超進攻甯國指日必得手敗匪上竄亦在意中該撫前擬由嚴規杭賊勢浩大難期得力若俟蔣益澧等軍分道並進始無掣肘之虞該撫於擊退圖竄衢城逆賊後酌量情形相機辦理斷不可輕率前進江西防兵無多而沈葆楨尙能布置惟閩省之兵多不得力該撫仍當與慶端耆齡會商戰守機宜庶免賊匪乘虛鈔襲查鈔已革道員張景渠家產均著變價提充該撫兵餉其餘零星物件卽著賞給營中出力兵弁所請飭催湖北等省軍餉已諭官文等迅速撥解矣將此由六百里諭令知之○前大學士署左都御史彭蘊章因病乞休允之○壬辰諭內閣前因浙江紹興等

府縣相繼失陷王履謙以幫辦團練大員倉皇出城當將該員革職摺問交曾國藩左宗棠嚴訊茲據左宗棠奏訊明王履謙於甯紹喫緊時已咨調鹽運使莊煥文等助防紹郡尙無不願設防之舉惟臨難出走咎無可辭等語王履謙以在籍幫辦團練大員雖無棄城先遁情事惟事前既不能與地方文武和衷布置事後復倉皇遠遁卽予立正典刑亦屬咎有應得惟念該革員究係本籍紳士辦理團練之員與地方官吏職司守土者尙屬有間王履謙著卽照擬發往新疆效力贖罪以爲貽誤取巧者戒○諭議政王軍機大臣等托明阿等奏賊匪東趨渭南縣城失守潼關喫緊並請催金國琛何紹彩兩軍赴陝各摺片賊匪竄入渭南縣境團勇接仗失利縣城被陷並將華州城池攻陷見在該逆已竄至華陰廟距潼關不及四十里潼關爲全陝咽喉勢居扼要托明阿等見

將河南撤回馬隊截留該處並將潼關以東防兵調赴關門助守
著卽飭令在防文武固守待援毋令賊匪竄踞渭河以北各州縣
已將渡船撤盡沿河列戍民團勢頗聯絡惟同州一帶回民見復
聚眾乘機焚掠漢民受害者憤起紛爭見在外侮未靖而漢回又
復尋仇互殺實係腹心巨患著瑛棨張芾卽飭見派之漢回官紳
速行馳往曉諭解散令其立功自贖儻始終抗違卽督飭鄉團將
起事焚掠之回匪嚴拏懲辦以免賊匪勾結其安分良回卽著瑛
棨等仍遵前旨妥爲聯絡以資守禦至潼關一帶距茅津渡不遠
英桂見已前赴蒲州著卽飭令茅津渡文武嚴密防堵並將黃河
東岸扼要處所分布兵勇聯絡鄉團毋令賊匪偷渡至三河口船
隻已由陝省盡數提歸北岸風陵渡停泊該處係晉省蒲州所轄
英桂務當督飭該地方官嚴密稽查毋許船戶私行放渡儻有疏

虞惟該撫是問楊飛熊一軍見在尙無入關信息竇屬疲玩此時賊勢日向東趨難保不復竄豫境鄭元善務當迅飭楊飛熊督帶援兵由洛陽一帶馳赴潼關迎頭截擊保陝省之關隘卽以固豫境之藩籬毋得再事遷延致干嚴譴至山陽股匪屯聚萬餘難保不北竄平原腹地與華陰一股合併孔廣順兵勇較單見已將商南間丕敏之兵移紮藍田縣屬之秦嶺等處卽著相度機宜嚴加布置以杜北竄署南陽鎮總兵徐榮柱一軍見已前赴商南著鄭元善卽迅飭進兵駐紮商州之劉嶺與陝省兵勇夾擊毋稍遲緩鄖西一帶見據托明阿等報稱亦有賊匪滋擾著官文飭令金國琛一軍駐紮鄖西一帶堵剿其何紹彩一軍諒已起程著卽飛催迅由荆紫關入陝繞出賊北由商州前進兩路夾擊使鄖西之賊不至併歸山陽並著多隆阿率同雷正綰督帶所部星速拔營入

陝馳赴潼關一帶迎頭截擊其蒲同一帶地勢緊要已催成明管帶京兵迅速起程前往駐紮南山商雒山陽鎮安等處兵力甚單前據沈兆霖奏調派甘肅官兵一千五百名交馬德昭帶領赴陝著卽飛飭該提督由漢中一帶馳往商雒等處視賊所向相機截擊毋許稍涉延緩致誤事機至漢南賊匪見由牟家壩至青石關距川省通江甚近此股敗匪爲數無多卽著瑛棨等飭令地方文武會同川省所派楚軍就地殲除毋令復竄川境將此由六百里加緊各諭令知之○諭慶端奏大股逆匪竄撲溫郡瑞安迫近閩疆徐宗幹奏溫屬軍情喫緊各一摺浙江青田等處逆匪由甌江過渡竄撲溫郡復糾集逆黨分路鈔襲並圖擾瑞安平陽二縣溫州瑞安均已被圍遊擊李朝安續募臺勇到省業經徐宗幹派赴福甯相機前進並催令副將吳鴻源督全幫師船由瑞平駛赴溫

州策應著慶端趕緊催提以資戰守仍飭溫州瑞安城內文武固
守待援毋稍疏懈曾玉明前經飭赴臺灣剿彰化賊匪茲據慶端
奏賴得福陣亡其部勇非曾玉明不能整集卽李朝安等之勇亦
須該員統帶方能得力著卽飭令帶兵馳援溫州俟該郡情形稍
鬆再令赴臺洪毓琛於臺灣地勢民情均稱熟悉本日已降旨將
該員調補臺灣道徐宗幹卽責成該道實力勦辦曾玉明旣未能
赴臺應如何添兵策應並著妥籌辦理福甯距省不遠設有疏虞
關繫閩省全局慶端已飭福甯鎮抽調兵丁馳赴福鼎聽候道員
曾憲德調遣著徐宗幹就近調度以顧根本耆齡由粵赴閩刻下
應已趕到昨諭於閩浙交界駐紮著俟抵浦城後與慶端籌商或
分軍兼顧溫處總須視賊所向力遏兇鋒不可稍存畏蕙致滋貽
誤昨據左宗棠奏壽昌龍游之賊復竄衢郡該撫擬親往督剿自

爲力固江閘門戶起見惟溫州十分喫重該撫亦應兼顧著卽與慶端等會商調度無使稍有疏失其蔣益澧劉培元所部已抵何處仍卽飛催前進以厚兵力而資調遣將此由六百里加緊各諭令知之○以江忠濬署安徽布政使○以劉典爲浙江按察使○予浙江殉難知府廖宗沅祭葬世職建祠○予陣亡浙江遊擊賴得福福建道員孔昭慈等祭葬世職○予陝西陣亡知縣曹士鶴祭葬世職建祠○癸巳諭議政王軍機大臣等昨日徐宗幹奏賊撲溫郡瑞安逼近閩疆一摺業經寄諭耆齡並慶端徐宗幹迅速籌辦矣慶端辦事頗預信任私人營私罔利政務廢弛疊經被人參奏寄諭耆齡徐宗幹查辦並諭將慶端所信用之前任浙江鹽運使莊煥文道員章琮鍾峻司徒緒秦金鑑知府陳謙恩李鼎等各劣蹟該撫等不拘何人先到卽確切詳查嚴行參奏見在徐宗

幹已抵閩省慶端及各該運使道府被參情事均極重大著該撫
懷遵前旨迅卽查明據實具奏毋庸等候耆齡到閩致稽時日徐
宗幹仰邀特簡畀以封圻重寄閩省官場惡習亟須大加整頓該
撫向來尙能實心任事諒不至以瞻徇情面稍涉欺飾致負委任
也將此由五百里諭令知之○甲午諭議政王軍機大臣等傳諭
實錄館總裁官所有自道光三十年正月十五日以後至咸豐
十一年七月十六日止凡有交涉外國事件著照 皇祖宣宗成
皇帝實錄之例另爲一書該總裁等敬謹纂輯毋稍漏略○諭譚
廷襄奏官軍克復費縣南泉圍寨乘勝進攻水寨等處另片奏知
府林士琦與蘇克金等圍攻沙果寺賊寨匪首董執信等情願投
誠見在侍衛益謙帶兵過河各軍已將會合儘可悉數殲除已飭
該道府等趕緊辦理其盤龍山幅首岳相林等亦有求撫之說鄒

縣教匪在鳳凰山內修理圍卡人眾已將逾萬亟應趕緊剿除等語捻首董執信等經官軍剿敗窮蹙投誠其心實不可恃見經蘇克金帶赴僧格林沁大營卽著僧格林沁認真辦理其匪首等罪無可宥斷不可仍令漏網其餘脅從並著該大臣分別覈辦至幅首岳相林先經僧格林沁令札隆武等議撫見在該匪已回水套著僧格林沁譚廷襄仍飭各軍及該地方文武速籌進剿不可爲該匪求撫之說所誤僧格林沁自三月十九日攻剿王雙樓獲勝之後未接該大臣軍情奏報實深馳系前於四月二十八日據勝保奏生擒狗逆一摺經寄諭僧格林沁將該逆迎提處死見在是否已經辦理亦尚未據覆奏著一併迅速奏聞以慰廛念將此由六百里各諭令知之○諭有人奏叛練受撫包藏禍心亟宜先事密謀以除巨患一摺苗沛霖狡獪性成反正之說本不可恃見因

擒獻狗逆姑示羈縻苗沛霖攻陷壽城偏令地方官殺害紳練孫家泰徐立壯等並將黃鳴鐸拘禁凌虐其餘種種不法情事罪不容誅曾國藩等前有俟克復廬州再圖苗練之奏李續宜到皖後立論亦專意主剿見在皖省兵力是否足敷剿洗苗練黨與是否易於解散若從南路進兵當用何術杜其北竄在李續宜身任皖撫於此事諒必胸有成竹著會商曾國藩即將見在籌辦情形星速馳奏儘慮勝保一意主撫於剿苗一事難免掣肘不妨據實直陳即將勝保撤回亦無不可此事關繫全局於李續宜尤屬責無旁貸朝廷並不剋期旦夕責以成功該撫務當密審機宜確有把握著卽詳陳辦法毋有所隱原摺著鈔給閱看將此由六百里各諭令知之○諭據鄭元善奏督軍抵汝相機先取董寨再擣平輿老巢並雒南股匪由盧氏等縣回竄各摺片逆首陳大禧盤踞平

與其黨與不下百十股各占一寨遙爲聲援自汝郡以達信羅賊
圩林立雖此中甘心附賊者固多而被脅勉從者亦不乏人白應
攻其心腹以散脅從卽著鄭元善督同藩司張曜迅速進攻董寨
則平輿之勢旣孤不難次第攻克惟沈項一路豫省兵勇不敷分
勦亦係實情前據勝保奏稱遵派馬隊八百名步勇二千名馳赴
周家口扼勦卽著該大臣迅飭前往出鄭元善就近調度並著鄭
元善派員迎提以資攻勦至正陽一路與楚北毗連該省小林店
三里城等處防兵距豫境賊寨皆在數十里或百里之內與其株
守以待賊何如移營前進以勦爲防官文等素顧大局卽著酌量
情形抽撥勁旅數千名於道員梁作楫等內酌派一員統帶取道
信羅越境會勦儻豫境南路廓清仍由官文等撤回調遣鄭元善
毋得久畱以致楚防空虛雒南股匪旣由盧氏等處竄至郟城搶

渡向東南五溝營一帶奔竄圖回潁郡勢必取道陳郡著勝保派兵於周家口一帶截擊此股賊匪西竄陝省勝保鄭元善既不能扼堵於前若再任其回竄不行攔截其玩誤之咎更屬難追見在華陰賊匪回攻潼關意在飽掠回竄鄭元善慮其擾及晉疆亦屬意中所有該撫已飭楊飛熊兼程入關而豫省別無可調之兵亦係實情勝保自攻克邢圩後尙未別籌進兵卽著移緩就急將前調豫省兵勇迅速飭回河南交鄭元善調度楊飛熊到陝後如賊已出關卽著鄭元善飭令扼防渡口以保晉疆多隆阿等軍仍著官文催令前進並遵前旨酌派一軍由蒲州進扼以期迎頭攔截毋稍遲誤將此由六百里各諭令知之○乙未曾國藩彭玉麟奏逆匪竄踞金陵以蕪湖爲屏障以東西梁山爲鎖鑰尤以金柱關爲關鍵臣彭玉麟與曾國荃定計必從金柱關入手則蕪湖與金

陵老巢橫中截斷賊勢乃孤因飭總兵李成謀會督各營水陸併
攻將上游水師悉調赴裕溪口以下曾國荃率馬步十五營近偏
金柱關下臣彭玉麟派李朝斌等從上游奮攻以躡賊後派成發
翔等從下游環擊以遏賊前曾國荃復率各營馳抵太平府北門
揮軍掩襲斬卡突進該逆駭走入城閉關不及相率潰逃我軍擁
進北門斬馘三百餘級遂將府城克復臣彭玉麟親率各軍瞭見
曾國荃已繞出三汊河遂分水師爲三隊以二隊分扼江汊要隘
以一隊分攻金柱關以火礮火箭連環轟擊賊於烈燄衝突而出
我軍躍上隄埂短兵擊刺積骸滿渠卽時攻復金柱關並將三汊
河上駟渡數十壘一律平毀奪獲大礮二百七十餘尊旗幟刀矛
萬餘件東梁山賊匪亦經黃翼升成發翔等一戰而下移軍進攻
蕪湖同知曾貞幹自率所部循江而進適與黃翼升等水師會合

萬礮齊轟羣賊內亂棄壘潰奔經官軍圍殺殆盡餘賊悉向官陡門濮家店折竄而東復經彭毓橘伏兵截殺生擒三百名賊乃轉走護駕墩掠舟偷渡李朝斌帶各哨三板橫出截擊賊敗趨薛鎮渡口又爲彭毓橘伏兵所敗生擒七百五十餘名黃翼升擊賊於清水河俘馘亦以千計提督王明山率外江水師四營赴鍼魚嘴行抵烏江鎮對岸烈山有石壘二座斜對九洲洲王明山帶各船渡江偪壘攻擊擒斬無算立破堅卡其九洲洲之上面又有大勝關賊壘一座王明山率隊環攻萬化林將江中賊船全行焚燬壘賊大震奪路狂奔我軍四面蹙之鏟平逆壘奪獲槍礮極多臣等查太平府屬莫要於蕪湖一城尤莫重於金柱關一隘自攻奪此關上下各城要隘悉爲我有從此節節進取均有可乘之機上諭內閣逆匪竄踞金陵以蕪湖爲屏障以東西梁山爲鎖鑰尤以

金柱關爲關鍵經彭玉麟與曾國荃定計水陸併攻太平蕪湖兩城並克金柱關東梁山各要隘所有尤爲出力之李成謀著賞穿黃馬褂總兵李朝斌黃翼升成發翔均著交軍機處記名遇有提督缺出請旨簡放○李鴻章奏南橋鎮爲浦東適中之地賊匪負隅死守築壘濬濠內設礮臺四座四月十八日官軍會同進攻賊匪槍礮如雨法國提督卜羅德粹被槍子穿胸登時陣亡西兵憤甚疊用巨礮轟倒西面礮臺該逆猶開礮力拒各兵躍濠而入爭先奮擊賊始敗走奉賢縣知縣陳化鯤率團四路追截先後殺賊三千餘名當將南橋鎮賊壘攻克餘賊望柘林逃遁二十日各軍進抵柘林該逆憑險負固金山逆黨突出數千來援沿途放火直逼我營西兵擊走之二十二日官軍開礮轟擊旋將西門轟裂大隊擁入餘賊東潰追殺不可勝計立將柘林城克復二十三日陳

化鯤等帶領團勇乘勝進攻奉賢該逆由海塘西竄縣城亦經收復臣處派往周浦之湘淮各勇四千名於二十日進抵南橋鎮紮營賊先結壘迎拒二十二日參將程學啟帶隊攻擊立將賊卡賊壘平毀淨盡殺斃數百人生擒四十餘人賊眾夜遁我軍追過新場直至南匯城下因天雨收隊官兵收復柘林後原擬直趨金山衛以期一氣掃蕩頃聞太倉失利忠逆糾眾數十萬分撲嘉青寶三縣遂罷金山之攻折回援剿臣復親赴周浦將官兵拔往南橋相機堵擊查南橋爲浦東咽喉柘林奉賢兩城皆沿海要地此次我軍會同英法各兵奮勇攻克其尤爲出力員弁容臣查明彙案請獎

上諭英國提督何伯法國提督卜羅德統帶兵眾協同候補副將華爾進剿浦東南橋鎮該逆更番施放槍礮子密如雨法國提督卜羅德勇往直前撲近城濠揮軍冒煙衝入賊眾驚潰當

將南橋鎮賊壘攻克正在督戰間卜羅德中槍陣亡因思該提督
遠涉重洋協同中國兵將剿賊竟以奮不顧身臨陣捐軀洵屬無
忝使命勇烈可嘉披覽之餘殊深悼惜著李鴻章遵旨派委道府
大員前往賜祭一壇並著賞給庫存貂皮百張彩絨四端交議政
王轉給卜羅德家屬祇領用彰優異而慰忠魂○李鴻章奏僞忠
王李秀城駐守蘇州調集杭州嘉興各路賊匪合股前來忠逆自
統十餘萬人鈔撲太倉官軍後路知府李慶琛等紮營板橋援賊
驟至所帶五千餘人大半覆沒四月二十至二十四等日逆眾分
路攻撲寶山營盤臣飭總兵鞠耀乾等馳往援剿並嚴飭參將姜
德等扼堵長濠苦守數日旋將賊眾擊退其分竄婁塘之賊繞撲
嘉定縣城晝夜環攻副將熊兆周等奮力抵擊賊遂鈔至南翔黃
渡阻我餉運二十六日英國提督何伯等馳至南翔賊卽退去至

青浦城守事宜原派參將李恆嵩全隊進扼趙屯港四港口一帶
前於十九日陳逆大股分路竄撲李恆嵩失去礮船十餘隻二十
日趙屯港添賊十餘萬並在蔣胥浦及舊青浦對岸搭造浮橋鈔
襲後路我軍接仗頗有傷亡李恆嵩等退紮北簞山該逆衝至青
浦北門又分五路來撲李恆嵩等又退紮塘橋泗涇廣富林各處
賊眾連日圍攻青浦甚急官軍入城堅守松江府城亦經該文武
豫籌防禦其湖河來路並咨請曾秉忠派船分扼松江提標中營
參將李恆嵩帶水陸各勇六千扼守趙屯港乃屢次退紮毫無
布置應請旨先行革職畱任以觀後效參將姜德劉錫溫梁勝章
固守寶山卒能擊退援賊未便沒其微勞可否請旨均以副將補
用吳淞營把總鮑承泰接仗陣亡應請飭部議卹 上諭賊匪圍
攻太倉城外官軍營盤參將李恆嵩節節退紮致全營被陷實屬

畏蒞貽誤著先行革職畱任以觀後效如再有挫失卽著以軍法從事參將姜德劉錫溫梁勝章固守寶山擊退援賊尙屬著有微勞均著以副將補用其陣亡之吳淞營把總鮑承泰著交部議卹

○諭議政王軍機大臣等寄諭欽差大臣曾國藩前奉兩宮 皇太后懿旨訪問民間疾苦以慰視民如傷之念嗣有人呈稱上海已革副將馮日坤縱兵通賊署提督曾秉忠所帶長龍船在黃浦一帶擾害行旅且該署提督於上年縱容兵勇有搶掠英國貨船等事將軍都興阿捏報勝仗督帶水師之總兵黃彬設卡網利其部下郭定猷李新明與賊酬酢往來道員查文經將糧臺銀二十五萬兩侵蝕常鎮道高長紳辦理稅務悉委家人不可復問管帶水師之賴鎮海鞠耀乾周希濂在焦山與英國領事費姓相見被其斥罵惟運司喬松年署丹徒縣知縣田祚尙屬良吏提督馮子

材總兵詹啟綸李德麟尙能打仗江南士民急盼曾國藩抵境以解倒懸各等語江南水陸各軍原爲剿賊而設該省淪陷已久僅存上海及江北一隅軍火糧餉無一不取資於民力若如呈內所稱小民何由得離水火軍務何由得有起色我兩宮 皇太后觀此情形寢食俱廢雖所言未必盡實恐亦不盡無因水師通賊早有所聞前曾諭令該大臣實力整頓曾秉忠在滬滋擾亦經該大臣具奏見在百廢待舉積習過深非重賞峻法不足以挽頽風李鴻章雖已抵滬尙未暇實力整頓見又疊催赴鎮卽著該大臣密咨該署撫令其將呈內各款畱心訪察如馮日坤郭定猷李新明果有通賊情事該大臣卽行傳旨正法一面奏聞曾秉忠黃彬有滋擾網利劣款亦當嚴行參辦查文經侵蝕餉銀至二十五萬兩之多豈可令其逍遙事外必當按律查鈔懲辦荆溪縣知縣王濤

鎮江府知府金以誠委員黃文涵貪劣各款亦應詳細查明道員
高長紳如果貪庸畏葸何可稍事姑容田祚等如屬循吏不妨破
格保奏至已革知縣馮樹勳前諭該大臣提訊卽著從嚴審辦總
之江南軍務吏治廢弛已極非有不測之恩威不足以振聳發瞋
該大臣仗鉞專征責無旁貸務當仰體我兩宮 皇太后憂民之
心實力整頓其餘聞見所不及者亦當訪察查辦見在大兵已抵
金陵庶不至爲劣弁貪員所誤至江甯將軍都興阿前在湖北軍
營尙稱得力運司喬松年爲人近於巧滑呈內所稱是否屬實該
大臣總當秉公斷論不可因有旨飭查稍涉遷就馮子材等是否
可用卽著體察奏聞至該大臣前保赴營習練之主事周騰虎其
人長於持論而心術不端聞經該大臣保奏後在滬頗近招搖該
主事與通賊之藩司林福祥交好因爲畫策代作奏稿冀圖消弭

並有欲爲林福祥求作江蘇巡撫之信顛倒是非膽大妄爲該大臣素具知人之鑒諒因軍中使詐使貪冀收指臂之效第恐言過其實終至僨事該大臣素負重望不值因該主事爲人指摘著卽飭令回籍將此由六百里密諭知之○曾國藩奏欽奉 諭旨垂詢袁甲三李續宜勝保各情查袁甲三秉性爽直督師皖省與勝保交涉最多齟齬亦最甚勝保裨闔疑忌好陵同列本難與之共事袁甲三治軍數載不知選將訓卒練成勁旅反倚勝保招降之苗沛霖等恃以征戰亦實無足以自立之道徒授人以可侮之端惟臨淮一軍餉項之絀亦爲各處所未有以致叛民跋扈降將驕蹇實皆由於一貧如洗無術自強袁甲三屢因老母年逾八旬亟思陳情歸養特以臨淮尙無替人未能遽去計皖北軍事大定必將具疏引退似可允其所請他日還朝進用 聖主自有權衡非

臣下所敢豫爲擬議也至勝保才氣恢張自爲時流所不及惟自命過高常思陵跨一世而識量未宏徒以權變取勝往往予人以不能堪聞袁甲三往年曾致書勝保以苗沛霖性情陰鷙不可信爲腹心更須嚴密防之勝保乃令道員洪貞謙持此函示苗沛霖使之德已而怨袁臣所知如胡林翼翁同書李續宜嚴樹森等皆不願與勝保共事刻下廬郡克復狗逆就擒皖北已大致肅清李續宜之才足以綏定皖疆其力又足以制服苗黨可否請旨責成李續宜專辦安徽軍務臣亦勉籌兼顧或者仰秉宸謨不至隕越豫省自三月以來毫捻由魯郊西竄粵逆由新蔡南竄宛洛騷然山陝並警僧格林沁與毛昶熙圍攻金樓兩月未下亦不能繞顧豫省西南中原要地賊眾兵單合無請旨飭下勝保專辦河南軍務毋庸兼顧皖省李續宜亦毋庸幫辦汛地旣判功過自明勝

保如果離皖剿撫苗沛霖一股李續宜當任之袁甲三如果引退駕馭李世忠一軍臣當任之斷不敢畏難推諉上貽 皇上南顧之憂 上諭昨因有人奏苗沛霖包藏禍心宜先事密謀以除巨患等語業經密諭該大臣暨李續宜密審機宜將辦法詳細速奏茲據曾國藩奏遵旨密覆袁甲三李續宜勝保各節與昨日寄詢之諭旨適相脗合該大臣慮事周詳持論平允見在袁甲三既不能得力俟其具疏乞退卽當允其所請其李世忠一軍仍須該大臣妥爲駕馭李續宜才既足以綏皖疆力又足以制苗黨自應令其專辦安徽軍務以一事權勝保誇詐虛僞習與性成所以不卽撤回者因李續宜尙未前赴潁壽恐苗黨先發北犯不能不藉以羈縻實朝廷不得已之苦心也朝廷倚任疆臣將帥惟恐不盡其長豈肯稍掣其肘所請撤去勝保令其勿庸兼顧皖省各節其事

無不可行該大臣惟當迅催李續宜一面速赴潁壽一面遵照昨日密寄諭旨將馳抵潁壽後如何布置一切機宜迅速覆奏不准稍涉延緩將此由六百里密諭知之○諭曾國藩彭玉麟奏克復太平蕪湖兩城金柱關東梁山各要隘各摺片該逆竄踞金陵憑恃險要經曾國藩調度各軍疊將名城要隘次第攻克見在九洑洲亦將得手指日可進偏金陵惟該逆既失其所恃難保不窮極思竄江南軍務日有起色而江北防兵究形單薄萬一該逆鋌而走險亦不可不慮宜如何添兵布置以防逆匪北竄該大臣亦須妥籌兼顧將此由六百里諭令知之○諭李鴻章奏中外官兵攻克南橋柘林奉賢各城及縷陳近日各路軍情等摺南橋爲浦東咽喉柘林奉賢兩城皆沿海要地此次官軍奮勇攻克其在事尤爲出力員弁著准由該署撫彙案請獎逆首李秀城等糾黨十餘

萬分撲嘉定青浦兩城勢極危急雖經英法兩國全軍往剿該署撫總當督飭將士嚴密防剿不得專恃外援見在楚軍東下卽日進規九洑洲爲合圍金陵之計賊勢窮蹙必將鋌而走險疊諭李鴻章赴鎮以期與江北各軍聯絡一氣著卽恪遵前旨卽日前往鎮江整頓一切至滬上兵勇應如何設法裁汰整頓之處仍著李鴻章安籌兼顧並揀派得力大員赴滬管帶以資得力將此由六百里諭令知之○諭慶端奏擊退溫州瑞安竄匪見催水陸各軍合剿一摺據稱逆匪分竄溫州郡城以大股圍撲瑞安當飭總兵秦如虎等馳往溫州會同水陸各軍迎擊該逆卻退其圍撲瑞安之賊亦經張啟煊督同知縣黃宗貴集團援應該逆解圍而去見催遊擊李朝安分道進剿等語溫州瑞安之賊雖經擊退究未大受懲創匪蹤飄忽靡常難保不復圖竄撲見在兵勇雲集著慶端

等督飭水陸各軍視賊所向實力遏剿切不可有名無實致逆匪
闖入閩疆至所稱道員蘇鏡蓉召團剿賊克復仙居台州等城惟
未據該道員稟報其擊退竄撲溫州瑞安之賊詳細情形並著左
宗棠確切查明迅速具奏將此由六百里諭令知之○諭薛煥李
鴻章奏遵查浙省通賊大員先將訪獲蹤迹縷晰密陳一摺據稱
前浙江藩司林福祥杭州織造恆起署杭嘉湖道劉齊昂等三人
於正月間抵滬已革總兵米興朝副將張威邦亦續到上海嗣因
杭州被難紳民來滬均指稱該員等形迹可疑林福祥恆起遂搭
坐輪船聲言先到九江卽赴安慶投到劉齊昂亦坐輪船赴漢口
投其兄任所措貲再赴曾國藩軍營聽候查辦米興朝與江蘇候
補縣丞曾紹勳素識搭伴同往南昌張威邦由吳淞口搭船前赴
江北據云與馮子材同鄉素識欲往投依又都興阿部下帶兵之

廖姓並糧臺委員李小峯均係舊識亦必前往稱貸若不能久畱
欲赴李世忠處投效各等語前據薛煥奏杭州士民僉稱林福祥
降賊爲僞官恒起及劉齊昂米興朝均在招賢館張威邦亦在賊
中該藩司等皆係朝廷大員如果有通賊情事審明後自應悉行
正法豈可任其日久稽誅薛煥等於此等重大要犯辦理殊屬疏
忽林福祥恒起計已早抵九江是否尙在江省著曾國藩沈葆楨
密派幹員迅速查拏劉齊昂之兄劉齊銜見升陝西糧道該道員
曾否起程赴任劉齊昂是否隨同赴陝著官文嚴樹森就近嚴密
訪查勿令逃逸米興朝旣與曾紹勳同赴江西省城卽著沈葆楨
密飭稽查不難弋獲除馮子材另行諭令訪查該大臣等不必行
文知照外著都興阿密查帶兵之廖姓及糧臺委員李小峯係屬
何名卽傳該員等面詢張威邦曾否來揚見在藏匿何處見經薛

煥密泝知府汪有勳跟蹤尋訪並咨行該將軍等會拏卽著都興
阿嚴密查辦毋稍寬縱張威邦既有赴李世忠投效之說著袁甲
三傳諭李世忠如張威邦已到該營卽將該員拏問以上五員該
督撫將軍等於拏獲後均著隨時解赴曾國藩軍營嚴行審訊如
通賊屬實卽一面奏聞一面正法不准稍有瞻徇將此由六百里
各密諭知之○丙申諭內閣御史朱潮奏請開畿輔水利以裕民
食一摺國家建都燕京歲漕東南糧米數百萬石勞費不貲允宜
妥籌北省水利以裕民食而省轉輸直隸通省地方西北倚山東
南濱海凡山泉匯注及海潮涌灌之區均可開河築壩引水溉田
俾成沃壤康熙年間天津鎮總兵藍理曾於天津地方開渠築壩
引溉稻田著有成效雍正年間曾於直隸設水利四局經怡賢親
王及原任大學士朱軾辦理歲收稻米三十餘萬石明效在前彰

彰可考地方大吏果能如藍理等之畱心經濟力求足民裕國之謀卽南省漕糧梗阻亦何慮倉儲缺乏耶該御史所奏實係方今要務兼可爲儲備京倉之謀著直隸總督順天府府尹速將所轄境內山泉河渠淀湖共若干所並可開渠引水地方若干處切實查明繪圖貼說詳細具奏至辦理一切事宜及該御史所稱鑿井造車並以田地之墾治與否定府縣考績之殿最及勸紳富捐助經費給予獎勵之處並著文煜萬青藜石贊清一併妥議章程覆奏毋得以事涉難行稍形推諉○諭僧格林沁等奏勦辦會捻等匪疊次獲勝一摺山東長槍會匪北竄東明縣境經署翼長蘇克金等馳往會勦匪首董執信等率眾投誠並將槍礮器械全數呈繳捻首趙浩然盤踞埋頭集地方經營總富和馳禁永夏一帶將被脅各圩寨數十處全行招撫復會團進攻埋頭集斃賊百

餘名當將埋頭集克復擒首李加膺等意圖援救趙浩然又經官軍迎剿共斃賊千餘名其德楞額一軍於蘭嶧境內攻剿賊寨先後斃賊一千五百餘名將黃山蛇山等山砦房屋盡行焚毀奪獲贏馬槍礮無算剿辦尙爲得手仍著僧格林沁飭令各路帶兵各員乘勝剿辦毋畱餘孽○諭議政王軍機大臣等僧格林沁等奏金樓賊勢窮蹙擊敗亳州援賊剿辦曹屬會匪進剿棍捻教各匪情形各摺片金樓教匪久抗官軍疊經僧格林沁督軍圍攻見在圩內乏食陸續投出其圖援金樓之毫捻亦經蘇克金馬隊擊敗務宜乘該圩糧盡援絕之時速圖攻克庶不致以得力全軍爲一隅所牽掣長槍會股匪業經恆齡等截擊該逆聞風遁回永夏一帶匪圩亦經該大臣派兵剿撫兼施將脅從各圩漸次解散並將埋頭集攻克李加膺等股匪擊退惟竄踞東明之沙果寺匪首董

執信等被勦窮蹙率眾投誠該匪於官兵未集之時肆行滋擾比及戰敗又復以投誠爲救死之計且曹屬東昌一帶降眾聚處已多該大臣務宜將董執信等一股妥爲安插令其散居各處歸地方官嚴行管束毋任麇聚一隅復致滋事其棍匪岳相林等久在費縣一帶盤踞多寨刻下因有重兵扼紮曲阜泗水見已投誠隨兵勦匪務飭趙康侯等妥爲辦理此事不難於收降而難於將來撤兵後不爲地方貽患嗣後該大臣務宜飭令帶兵各員於收降一事加意慎重不可輕率此時汝甯一帶土匪勢熾蒙亳永宿等處捻匪勢將於麥熟時出巢竄擾鄒縣教匪負嵎日久該大臣俟攻克金樓時應向何路移兵進攻卽著就當時事勢審度緩急酌量辦理勿稍拘滯將此由六百里諭令知之○諭吳棠奏攻克海屬羽山蓮子溪賊圩該匪逃聚朱洲圩內負嵎固守見在紮營進

偪晝夜環攻並派都司張保聖等馳赴海州助勦等語該逆盤踞朱洲深溝高壘雖經官軍疊次轟擊而急切未能得手亟應設法圍攻爲一鼓殲除之計著吳棠督飭袁世功等列營進偪將朱洲賊圩迅速攻拔海州本屬完善地方該署漕督務將此股土匪悉數殲除盡法懲治毋得稍涉疏懈將此由五百里諭令知之○諭英桂奏逆匪連日攻撲潼關未能肆志由南山小路竄入河南閿鄉縣境見由閿鄉靈寶竄至陝州等語前據陝省馳報賊由華陰直撲潼關數日以來未接陝省續報軍情其華陰廟之賊是否撲擾潼關本日英桂所奏由潼關竄往閿鄉等處之賊係屬何股華陰山陽等處地方有無賊蹤見在陝西境內之賊尙有幾股何處尙爲賊踞著托明阿瑛榮孔廣順張芾一一詳細馳奏見在秦中之賊已由潼關東走豫境正可迎擊著鄭元善等迅飭楊飛熊相

機辦理關中之賊恐未全數遁走孔廣順督兵追剿見在何處瑛
 棨當迅飭各地方兵團嚴密防範毋令東走之賊回竄得以恣其
 蹂躪漢南賊匪由牟家壩竄青石關後情形如何仍著飭令文武
 會同川省所派楚軍就地殲除閬鄉陝州一帶在在與晉省濱河
 接壤茅津渡太陽渡等處均須嚴防著英桂擇要駐紮飭令沿河
 地方文武督率兵團實力防剿毋令一賊偷渡京兵見在陸續起
 程並可相機迎剿以壯聲威而固藩圉將此由六百里各諭令知
 之○諭毛鴻賓奏貴州銅仁教匪分數股屯踞壩盤等處勾結內
 匪爲數甚多又天柱逆匪姜映芳竄擾小江口一帶與湖南晃靖
 各屬壤地相接見籌調派兵勇分投布置廣西恭城土匪周永興
 與荔浦張高友一股均屬負嵎未下而潯州黃逆梧州陳逆皆灰
 燼復然昭平之木格馬江口又有匪徒嘯聚出沒添調兵勇前赴

永州防勦等語貴州石阡苗教等匪猖獗如此何以黔省尙無奏報田興恕曾否出省前諭帶兵進勦玉華山等處賊巢務須親督勁軍迅籌掃蕩韓超前奏石阡郡城危急嗣後未聞作何辦理見在湖南所派之副將周洪印等業已進紮銅仁城外其續派鎮守標兵亦進駐大興場以爲聲援著韓超卽遵前旨飭令派出官兵與楚省各軍會合勦辦如兵力不敷卽與田興恕會商派撥以資得力其天柱股匪亦著派出兵勇會同楚省靖晃邊界總兵趙福元等軍趕緊撲滅毋任燎原廣西地方甫期漸就廓清蔣益澧移軍赴浙各屬匪徒勢必乘機復起劉長佑前奏親自帶兵出省赴潯勦辦著卽趕緊將潯梧餘孽痛加掃除並卽派撥兵勇將恭城等股與楚省駐紮永州之王永章等聯絡兜勦毋稍玩延毛鴻賓所派黔粵連界地方防勦各軍卽著飭令實力辦理總期毋分畛

域務與黔粵兵勇將各股匪併力殲除以靖地方是爲至要將此由六百里各諭令知之○諭江西等省捐濟淮餉○撥廣東運庫海關銀各五萬兩協濟江蘇軍餉○丁酉諭議政王軍機大臣等官文多隆阿奏多隆阿統率馬步各軍赴陝援剿一摺覽奏均悉所籌援陝之策深以兵力未厚爲慮見在廬州已克狗逆就擒皖北軍務得手南岸水陸各軍連克太平蕪湖金柱關及東西梁山即可進規金陵東征大兵雲集已成破竹之勢而關中形勝最要秦隴猶爲完善之區尤宜保全多隆阿統率馬步各軍萬餘起日兼程赴陝援剿洵能權衡緩急顧全大局與疊次寄諭亦相脗合本日業經明發諭旨命多隆阿督辦陝西軍務全陝官軍旗綠各營提鎮道府以下統歸節制矣多隆阿忠勇樸誠戰功卓著茲率得勝之師星馳援陝定能所到克捷痛殲醜類保全關陝完善地

方所需口糧雖由官文等等籌備起程仍著瑛棨英桂於山陝兩省迅速豫爲寬籌探明多隆阿大營源源解濟以資飽騰而利征剿前據瑛棨等奏陝省逆匪由渭南華陰悉數直撲潼關情形甚爲喫緊昨英桂奏潼關之賊又竄由閿鄉靈寶東走陝州惟關中山陽華陰等處均曾被陷此時是否尙有賊踞未據瑛棨等奏報多隆阿自廬赴陝自以援剿關中爲急亦應確探賊勢以圖進取尤宜屏蔽晉省保全完善地方鄂省襄陽防剿與何紹彩等軍仍著官文等飭令相時進止以資兜剿而防紛竄將此由六百里各諭令知之○諭官文奏多隆阿帶兵援陝請卽授爲欽差大臣等語覽該大臣所奏自爲統一事權以重軍務起見多隆阿謀勇兼全聲威素著允足當茲重任第陝省之賊由豫竄往股數無多不難剋期戡事卽可毋庸頒給關防非有靳而不與之意見旣命該將

軍督辦陝西軍務卽屬事權歸一責任重大多隆阿諒必能仰體此意益矢公忠迅速殄滅賊氛用紓朝廷西顧之慮將此由六百里諭令知之○命荊州將軍多隆阿督辦陝西軍務○戊戌諭內閣據戶部封送軍機處欽差大臣曾國藩咨文一件內係恭錄寄信諭旨咨會戶部查照事件經議政王等將原文呈覽各路軍營及督撫等接奉軍機處寄信諭旨如內有應行轉咨各該衙門遵辦者理宜僅將諭內干涉各該衙門者節錄知照其餘緊要軍情等事皆應祕而不宣以昭慎重此次曾國藩因寄諭有辦理釐金事件卽全行鈔錄知照戶部殊屬疏忽曾國藩著交部議處嗣後凡有寄信諭旨除將實有辦項者節錄知照外餘均不准全行鈔錄咨會以重軍務將此通諭各路統兵大臣各督撫知之○諭議政王軍機大臣等總理各國事務衙門奏外國與賊接仗構釁甚

深聞將調集印度兵大舉助剿請飭江浙督撫迅速籌議一摺倭兵助剿之議屢經曾國藩等先後覆奏僉稱有害無利前因上海喫緊英法兩國情願幫同戰守是以未經阻止見在江南之師連克名城已成破竹之勢曾國藩函致總理衙門擬令黃翼升統帶水師由松滬直入太湖以爲進兵之路甚合機宜著該大臣卽乘此聲勢督飭各軍進逼金陵迅圖克復李鴻章將上海事宜布置後亦卽趕赴鎮江由句容一路會師進剿兩路夾攻可期得手若金陵旣拔則蘇常勢必瓦解官軍可一鼓成功各要地皆爲我有外國調兵前來無所更用彼力至甯波郡城前經張景渠陳世章帶同水師阿伯等前去收復張景渠等係臨事逃避應行查辦之員斷不可令其督兵防守且阿伯一員原係廣東海盜投誠尤須妥爲駕馭並著查明阿伯投誠後改爲何名見充何職一併詳細

具奏左宗棠仍遵前旨選調得力員弁帶領兵勇航海赴甯協同
華爾常勝軍七百名聯絡守禦毋稍遲誤並著李鴻章不分畛域
就近調撥一軍前往助守不至爲外國輕視方爲妥善將此由六
百里各諭令知之○諭前因薛煥熟悉外國情形諭令以頭品頂
帶充辦理通商事務大臣並疊諭將洋人協辦諸事會同新署巡
撫李鴻章妥爲經理茲據薛煥奏南洋通商各口事隸將軍督撫
監督辦理若專設大臣統轄地方較多鞭長莫及事勢亦多格礙
請卽裁撤各歸本省督撫將軍經理並片陳長江通商事屬初始
必須平時勦望隆重乃能懾服遠人請於官文曾國藩特簡一員
兼領其事各等語南洋通商大臣本係道光年間經耆英等議定
設立以爲交涉事件在外交商辦之計迨英法各國公使駐京後一
切緊要事件均由總理衙門辦理其餘關稅事務則由管關之監

督道員會同各國領事官經理仍由該省將軍督撫稽察已足以資控馭上海雖爲各國匯集之所而所設止有領事官若該道員辦理得宜巡撫安爲稽察則諸務已有責成所請裁撤之處洵爲因時制宜欽差大臣本係改爲兩江總督兼攝曾國藩威望遠著爲外國人所警服長江通商事務由該大臣經畫自能措置合宜惟前因曾國藩辦理軍務在江面布置昕夕不遑若再任以通商事務非所以示體諒見在江面肅清應如何安爲兼籌之處卽著酌量情形迅速具奏薛煥所稱南省宜以督撫兼領其駐紮之地須離洋人稍遠辦理方可順手李鴻章駐鎮以後能否兼顧無誤曾國藩從前曾經議及並著一併詳籌奏聞薛煥尙有交辦比利時國換約事宜著俟議定後一切就緒再行候旨遵行薛煥摺片各一件均著鈔給曾國藩閱看將此由五百里各諭令知之○命

工部左侍郎恆祺會同駐津三口通商大臣崇厚辦理大西洋國通商事宜○己亥官文曾國藩李續宜奏苗黨黃毛獸占踞霍邱縣城四月二十七日臣李續宜派道員蔣凝學統帶湘左等八營進剿行抵距霍四十里之三劉店地方蔣凝學偵知城中無甚準備一面修築營壘一面飛飭遊擊王文先等帶隊直逼城根該逆聞我軍猝至膽裂心寒我軍更番猛撲日暮始收隊回營該逆遂於是夜遠颺當將縣城收復二十八日蔣凝學率隊入城安輯難民追捕餘黨其附近脅從各圩均經分別剿撫次第辦理此次出力人員可否由臣李續宜擇尤彙案保獎出自恩施上諭內閣官文等奏安徽霍邱縣被逆匪久踞經李續宜派令道員蔣凝學等帶隊逼城猛撲賊乘夜棄城遠遁當將縣城收復所有出力各員著准其擇尤彙案保奏○諭李續宜奏童年智烈殺賊捐驅懇

請旌卹一摺咸豐七年間賊犯安徽潛山縣天堂巡檢馮焯之子馮福基年十四歲聞警匿母他所身藏利刃殺賊爲賊所獲因伺隙刺賊弗得日夜哭泣隨至湖北黃梅縣境竊市肆藥置飯裏中毒斃賊十七人亦自吞藥而死馮福基以童穉之年護母陷賊用計毒殺兇黨多人卒能從容就義奇節至性可嘉可憫馮福基著交部從優給予旌卹以彰風化○李續宜奏苗沛霖以就撫爲名陰逞其蠶食之計見如壽州鳳臺懷遠蒙城潁上阜陽霍邱光州固始息縣商城十一州縣苗圩約在三千內外每圩或千餘人或二三千人不等四月間狗逆窮竄壽州苗逆擒渠獻功卽陰收其死黨二千餘人分布各圩去冬勾結髮捻共犯潁州迨郡圍旣解乃以勦張落刑爲蠱惑官軍地步張落刑黨與亦眾如亳州蒙城宿州潁上阜陽永城夏邑虞城蕭縣碭山十州縣中築圩不下二

千每圩人數亦與苗圩約略相同其所以不獲逞志於苗者以連年與髮逆在皖鄂地方疊受重創於楚師也此時苗之蓄奸極思乘機殲除捻首而暗收其眾植黨日積而愈繁人心久附而彌固再緩數年苗患恐在粵匪以上是苗逆之必須急勦已無疑義臣疊經出示曉諭無非殲厥渠魁脅從罔治之意卽與官紳接見亦無非以勦苗撫眾爲詞是以姚有志文占魁等先後乞撫於道員蔣凝學者已一百餘圩當卽平其圩繳其器械散其羽翼使不能復聚以貽後患四月二十七日蔣凝學收復霍邱王庭用等乞撫者又三十餘圩仍照舊安輯復業歸農臣見飭蔣凝學趕將霍邱善後事宜妥辦卽馳赴潁州該道未到以前仍責成道員黃元吉嚴加防範毋任苗黨出入城中前調提督成大吉蕭慶衍等拔赴三河尖該處踞匪潘壇亦倩人乞撫見飭相機勦辦俟三河尖事

畢成大吉等沿淮節節埽蕩直擣正陽既可剪除苗黨並可疏通
餉道臣本應速赴潁州因該郡屬在偏隅難以照料全省又湖北
爲後路軍需根本須統籌兼顧臣駐紮處所尙須隨時酌度似難
拘守一隅且蔣凝學到潁後辦理防剿必能妥協當不至有貽誤
上諭議政王軍機大臣等據李續宜遵覆籌畫苗練情形所慮
實爲深遠苗逆爲患皖豫以乞撫爲緩兵之計朝廷早燭其奸該
撫所陳各情實與朝廷所慮相符惟苗逆所占各圩自固始以達
壽州人數眾多若由南路進剿該逆必由固始北竄僧格林沁之
兵圍攻金樓未下恐不能堵遏而張逆則由亳州以達蕭碭設同
時進剿若北竄東省南擾清淮亦無此重兵堵截其應如何進剿
杜其北竄並防苗張二逆勾結爲患之處著該撫仍遵前旨與曾
國藩妥籌迅奏以便將勝保撤回以一事權多隆阿督辦陝省軍

務若陝西情形較鬆多隆阿應如何分顧北路以防苗張各逆被
勦奔竄並著李續宜會商官文曾國藩詳籌密陳至該撫因潁州
較偏未能兼籌全省事務係屬實情著照所請隨時擇要駐紮以
顧大局其成大吉等軍如何進剿之處卽由該撫相機辦理該撫
曉暢戎機志慮忠純久爲朝廷所信任一切不爲遙制但當力任
艱鉅不可稍避嫌疑遇事密陳以副期望將此由六百里密諭知
之○諭田在田奏捻逆李城等由黃山東趨經官軍擊退匪首李
城李百等率賊直撲宿城經田在田飭令遊擊楊文全等分投剿
擊踏破賊營八座並乘勝攻破高黃山寨其時村等處之賊亦經
官軍擊退連日該捻首又糾黨前來復仇已至城西二十里各等
語該處捻匪股數眾多而李城任縛得等尤爲狡悍見當一麥成
熟之際尤防其四出擾掠高黃山雖經攻克而該匪等糾黨聲稱

復仇著卽奮力迎剿並著督飭官軍乘勢進攻奶奶山巢穴務絕根株豫省金樓踞捻據僧格林沁奏到將次攻克各路官兵指日進擣蒙亳老巢徐宿適當其衝田在田務當督率所部嚴行截剿力遏北竄將此由六百里諭令知之○諭托明阿奏粵匪攻撲潼關官軍內外勦擊疊獲勝仗立解城圍一摺前據英桂奏該匪竄至陝州與茅津渡僅隔一河數撲河灘若楊飛熊一軍迎剿獲勝難保不乘間渡河擾及晉省多隆阿見在督兵前進著卽沿河西上先將河南閿鄉一帶回竄匪眾迎頭截擊毋令闖入晉疆再由潼關一路相機進剿如探明陝省賊勢不甚喫重或先酌派兵數千交雷正綰管帶星速赴陝相機策應該將軍卽可親督大隊駐紮北路適中之地以防皖豫捻匪被剿北竄應於何處扼紮爲宜該將軍可與官文鄭元善籌商定見山陽踞匪亟宜迅速殲除著

孔廣順督率所部會同徐榮柱援兵合力兜剿如兵力尙嫌單薄瑛榮等當察看情形卽咨調雷正綰一軍馳赴山陽會師進擊本日瑛榮奏請飭將京兵二千留於山西等語成明見已起程所督帶之京兵二千名著全數帶赴山西與英桂會商於沿河要隘妥爲布置嚴密扼守其成明軍務卽著英桂會辦以期共濟其竄回豫境之賊著鄭元善調撥兵勇分投迎剿以期盡殲醜類馬德昭已由蘭州折回涇縣著托明阿等迅催該提督前赴漢中會同毛震壽督兵分剿陝省兵將漸集該將軍巡撫等務當激勵軍士督率鄉團將各處匪徒悉數殄滅方爲不負委任至高陵臨潼一帶漢回構釁業經張芾帶同漢回委員紳士前往開導回民亦遵教化各安生業其渭南等縣張芾等仍當持平辦理毋稍偏徇俾漢回相安方爲妥善將此由六百里各諭令知之○諭韓超田興恕

奏粵匪由川分股突竄正安廟堂等處並竄桐梓之松坎等地方
興義府城失陷普安安南均形緊急等語前因玉華山尙大坪未
據攻克疊經寄諭田興恕出省勦辦迅將兩山節節掃蕩肅清黔
境見在黔省軍務處處喫緊如田興恕所派之吳安康等辦理得
手桐梓一帶肅清卽令乘勝赴川實力會勦儻石逆全股竄黔尤
當會合川楚各師迅圖勦洗至滇省散練分起由黔入川膽敢開
礮攻城卽與叛匪無異著韓超田興恕卽飭兵練實力截回如敢
抗拒卽著相機勦辦不必稍存瞻顧一面飛咨川省邊界文武嚴
行截勦斷不可令其擾及川境將此由六百里諭令知之○諭潘
鐸奏張亮基在滇時頗愛林自清之才曾屬幕友見任漢中府知
府李定南爲之師教其讀書情甚浹洽請飭李定南赴川隨同張
亮基辦理等語漢中防務喫緊一時似難驟易生手惟潘鐸此奏

係爲先事弭患起見關繫滇蜀大局著瑛桀酌量情形遴選委員
前往漢中接辦防務一面飭令該守迅速馳往四川隨同張亮基
設法駕馭桀驚得以就範一俟辦理完竣仍令赴回本任以重職
守將此由六百里諭令知之○前太常寺少卿李棠階疏請於師
傳匡弼之餘預杜左右近習之漸並講解 御批通鑑輯覽及大
學衍義等書 上優詔褒答○以馬新貽署安徽布政使由記名道署

○辛丑諭內閣大學士會同刑部奏審訊已革大員鈔錄親供呈
覽請旨一摺已革兩江總督何桂清卽著大學士會同刑部定擬
罪名具奏○諭本年正月間命耆齡馳赴福建辦理援浙軍務時
逾數月始據奏報於四月十五日起程此次奏報係四月二十八
日所發尙在清遠途次距省止一百餘里似此節節耽延實屬不
知緩急廣東巡撫耆齡著先行交部議處如再遲滯不行定當嚴

行懲處○諭慶端奏克復台州郡縣並溫處所屬之縉雲樂清城池一招逆匪竄踞台州各屬經慶端札飭紳團會同官弁分路攻剿三月二十八等日署仙居縣費希濂督帶民團進攻仙居縣城斃賊數百名賊眾退入城內四月初三日設伏誘賊出城殺賊數千擒獲逆首延天義李元徠當將仙居縣城克復卽補道蘇鏡蓉等於初九日分帶兵團攻復台州郡城殺賊甚眾擒斬逆首二名各兵團直擣黃巖分路截殺初十日克復縣城其太平縣城亦經教諭周炳勳等糾集義民先將分踞縉鎮之賊圍殺三千餘人遂合力圍城晝夜環攻四月初三日由南門攻入殺賊七千餘名收復太平縣城甯海縣城亦經克復至分踞縉雲逆匪疊經民團設伏夾擊殺賊甚多已革知縣周士英密約紳董進攻壺鎮賊巢殲斃悍賊三千餘名復添集練勇環擊縣城訓導吳大治等斬關而

入於四月初十日克復縉雲縣城樂清縣城亦經總兵秦如虎等
派撥師船四面圍攻於四月十九日克復此次台州官紳團勇奮
力助剿連克台州等一府六縣實屬忠勇激發深堪嘉尚所有在
事員弁紳團人等著慶端會同左宗棠查明彙案請獎仍著督飭
秦如虎等軍將竄近福建界內之賊實力剿洗毋畱餘孽○李鴻
章奏賊首僞什天安吳建瀛等統眾踞守南匯縣城自官軍踏毀
杭頭新場賊營後吳建瀛劉玉林屢次乞降情詞懇切五月初一
日都司銜劉銘傳會同知潘鼎新等分帶勇團直抵城下傳諭城
內全行薙髮並將各僞印兵器等件儘數呈繳我軍整隊入城降
眾萬餘伏地歡呼跪迎當將南匯縣城收復並解散脅從難民數
千人降酋吳建瀛劉玉林方有才各願率勇剿賊贖罪臣卽檄委
劉銘傳等妥籌安插降眾及善後事宜並令銘鼎兩軍移紮杭頭

就近鈐制吳建瀛等責令剿賊自效僞忠王李秀城之子聞吳建瀛投降遣賊萬餘由金山竄撲縣城吳建瀛等隨同該縣知縣鄧賢芬等帶勇出擊賊眾卻退劉銘傳派隊從旁迎擊賊眾披靡斬賊十餘級奪獲槍礮多件賊眾遂竄往川沙與踞賊合股回撲南匯蔓延二十餘里劉銘傳督同吳建瀛等登城固守並派隊出城夾擊賊眾敗潰官軍進圖川沙直逼城根賊隊盡由海塘竄去沿途截殺甚眾遂於五月初五日收復川沙廳城查南匯一城居浦東各縣腹地爲川沙奉賢之腰膂但使此城得手則浦東各廳縣之賊首尾不能相顧自可迎刃而解潘鼎新等招降逆首收復要區擊退援賊尙屬著有微勞合無仰懇 聖恩從優獎勵以昭激勸 上諭李鴻章奏賊首僞什天安吳建瀛等踞守南匯屢次乞降潘鼎新劉銘傳等入城受降帶同吳建瀛等擊退撲賊乘勢收

復川沙廳城勦辦尙爲出力丁憂候選同知潘鼎新著俟服闋後免選同知以知府畱於江蘇補用都司銜千總劉銘傳著以都司畱於江蘇補用並賞加遊擊銜以示獎勵署南匯縣知縣鄧賢芬於失守縣城後帶團助勦功過尙足相抵著免其查辦其餘在事出力員弁著准其擇尤保奏毋許冒濫○李鴻章奏自李慶琛規取太倉敗於板橋於是寶山嘉定青浦各城同時告警而嘉定之圍尤急臣所部湘淮勇南經派赴浦東不能倉猝回救嘉邑官兵晝夜巡防勢不能支四月二十八日賊匪大隊衝入副將熊兆周等暫退南翔鎮次日由南翔撤回上海嘉定一城復爲賊踞臣當飭令熊兆周等駐守法華以扼滬西來路惟嘉定復失逆匪復趨青浦松江五月初一日分兩大股一由北簞山鳳凰山牽掣泗涇之前一由方家窰過龍珠菴七堡繞撲泗涇之後蔓延數十里前

派駐守泗涇之遊擊林叢文等營大半潰散參將王玉林紮守廣富林元爲松江緊要隘口亦偏於賊勢退紮松郡北門該逆遂偏撲松城松江府知府賈益謙與參將李恆嵩商調唐橋之兵移紮城南已革提督曾秉忠亦帶水陸各軍由青浦回援副將銜華爾帶火輪船兩隻往解青浦之圍聞松江緊急趕回郡城而青浦常勝軍孤懸城中被圍甚急該逆四面築營三十餘座無路進援至泗涇官兵潰散營盤失陷後賊卽分股斜趨虹橋漕河涇一帶距滬僅二十里臣調回南橋之湘勇三千人到滬防守復飭參將程學啟等馳赴虹橋擇要扼紮相機迎擊以分青浦松江後路賊勢並令副將滕嗣林帶隊分道策應初六日程學啟前隊行至漕河賊股四五百人迎面撲來勢極兇悍程學啟督隊奮擊適參將張遇春等趕到前後包鈔掩殺六七百人生擒四十餘名賊奪路狂

奔初七日七堡之賊整隊欲進程學啟等乘勝追勦鏖戰半時賊卽潰走我軍一擁而前立將七堡賊壘四座燒燬淨盡官軍追至羅家塘一帶沿途賊卡一律勦洗將至泗涇賊大股萬餘回撲我軍槍礮齊施斃賊百餘名各營齊出接應賊匪敗退臣查松滬各防戰守皆不能得力臣新軍六千餘人昨因南匯投誠機會難得不得不酌畱浦東千人以資控制遂覺愈分愈單茲松青危急誠恐大股回撲上海臣軍須由滬城西南進紮一面堵截松賊一面策應滬防惟賊勢浩大兵勇節節潰退實深憤恨副將熊兆周等堵禦不力城池被陷均有應得之咎應請旨革職降補以示懲儆

上諭議政王軍機大臣等前據總理各國事務衙門奏稱英國領事官吉必勛向崇厚聲稱青浦嘉定二城髮逆大隊湧至華爾察看情形難以抵禦將該二城焚毀退回上海茲據李鴻章奏逆

匪圍攻嘉定英法提督見賊勢過眾挾該地方文武及畱防兵勇出城退駐南翔鎮復由該鎮撤回上海其青浦松江兩城雖經大股賊匪攻撲官軍尙能住守華爾並率洋槍隊在松郡東門擊賊各等語與總理衙門所奏情形大同小異惟嘉定縣城究竟是否焚燒常勝軍如何被圍甚急自當設法救援均著薛煥李鴻章查明妥籌覆奏見在西兵因賊勢重大退至上海不肯出戰該撫見派參將程學啟等馳赴虹橋扼擊並將七堡賊壘四座燒毀擊退泗涇回撲賊匪著卽迅飭進攻以分青浦松江後路賊勢總期我之兵力足恃毋得專恃西兵將此由六百里各諭令知之○諭本日據慶端奏賊勢猖獗曾元福在江山係因眾寡不敵稍有挫衄閩省福甯建甯兩郡與浙省溫處衢州各屬犬牙交錯防不勝防所部閩軍分顧幾及千里見飭將領以勦爲堵等語左宗棠見駐

開化力圖進取沈葆楨出紮廣信防禦周密是該逆既不得逞志於江西勢必全股趨重閩境該督身任兼圻責無旁貸著慶端督飭林文察秦如虎等於閩浙交界一帶實力嚴防並與左宗棠會同妥籌分路進兵力圖恢復浙省失守各城毋令該匪竄入閩疆以保完善將此由六百里各諭令知之○諭耆齡奏選練廣勇勦辦釐金一摺該撫奉命援浙已逾四月之久見甫自粵起行實屬遷延貽誤見在浙江溫郡解圍台州各屬亦報克復而賊氛未遠軍務方殷耆齡著仍遵前旨迅赴浦城與慶端籌商何路最緊卽由何路進兵總須視賊所向力遏兇鋒該撫此次節節耽延由省起程計已半月始抵清遠實屬不知緩急若再遲回觀望坐誤事機定當重治其罪所部廣勇據稱訓練已精約束尙嚴卽著督令帶勇各員弁認真稽察毋令滋事擾民廣東釐金一項已據曾國

藩奏派令道員黃冕等隨同晏端書辦理以濟江浙軍餉應如何
分撥接濟並著咨商留國藩等籌解耆齡所派委員卽行撤回毋
任重疊紛擾將此由六百里諭令知之○免直隸咸豐九年以前
積欠旗租○予陝西孝子嚴時仁旌表○予浙江殉難署知府龔
振麟署副將奎成祭葬世職○壬寅諭議政王軍機大臣等都興
阿奏派撥水師策應上游官軍剿辦獲勝並續籌會合水陸進規
金陵一摺據稱上游水陸各軍乘勝東下將沿江各郡縣及各要
隘次第攻克見已進攻雨花臺都興阿面商黃彬先派總兵李起
高等抽調師船上駛吳全美亦親督師船由瓜洲起旋進攻觀音
門等處躡平賊卡並將燕子磯賊壘躡毀復會同黃翼升等水師
迎擊九洲洲七里洲下關等處賊匪獲勝該逆遁回城壘見又添
撥所部師船期與楚軍聲勢聯絡進取金陵等語都興阿聞上游

水陸各軍得手卽調派師船會同攻剿連破賊卡賊壘辦理甚屬認真惟九洲七里洲等處悍逆麇集負隅亟宜乘勝殲除肅清江面著曾國藩都興阿分飭上下游水師併力夾攻迅圖克復都興阿所稱金陵逆首見在飛調僞忠逆由蘇常統帶大隊援救金陵一經官軍剿敗勢必鋌走竄擾下游所慮不爲無見鎮江防守情形最爲喫重李鴻章駐軍上海近因嘉定等縣城復被賊踞滬城軍情又緊該署撫能否抽身赴鎮著曾國藩李鴻章會商酌度辦理馮子材魁玉駐守鎮城責無旁貸李鴻章恐未能卽到著卽激勵將士戰守兼資毋令該匪乘間闖入曾國藩都興阿並當統籌兼顧如果賊勢趨重鎮城卽分撥勁旅前往援應毋誤事機至揚防見雖肅清而江北布置未可稍涉大意且福山許浦各口時有巨盜連幫出沒並著都興阿督率各軍嚴密堵截江北情形見

在防重於勦務於進取之中寓固守之意都興阿所稱接據曾國荃來函有曾國藩見已飛調多隆阿李續宜等馬步各隊進攻金陵之語多隆阿已有旨令其督辦陝西軍務疊經官文等奏到催令督率所部萬人赴陝李續宜見在勦辦霍六頴壽擒匪有無兵力可分著曾國藩兼權緩急酌量辦理勿致兩歧將此由六百里各諭令知之○諭前因僧格林沁奏曹屬會匪焦桂淐劉前句結擒匪李城等意圖北竄當經諭令併力殲除以清北路門戶茲據譚廷襄奏焦桂淐等竄至馬集經團總劉錫蕃轟擊旋即赴曹郡投誠等語匪首焦桂淐既經解赴僧格林沁大營卽著譚廷襄等咨照該大臣與董執信一併認真覈辦其遣散馬步千餘名及頭目曲元基等究係何往著譚廷襄飭令道員盧朝安督同該府縣等切實根究妥辦毋令貽患將來見在遮克敦布尙駐東明其派

出各軍應如何酌量分駐曹州以資鎮撫濮范等處王榕吉一軍
是否足敷堵剿以固北路卽著譚廷襄會商辦理總宜於直東交
界防務布置周密另片奏水寨教匪被剿狂奔惟官兵不能抽撥
赴兗尙未可以深入幅匪岳相林投誠業由僧格林沁發交免死
執照扎隆武恐譚廷襄攻克南泉圍寨或於撫事有礙等語岳相
林等旣經扎隆武等議撫原可卽由僧格林沁覈辦惟剿撫本當
並用勦苦得手則撫更易成譚廷襄自未便因該匪就撫空言遽
爾懸軍束手著仍飭沂州文武相機覈辦勿以瞻顧遷就轉形牽
制將此由五百里各諭令知之○癸卯諭議政王軍機大臣等官
文等奏援陝大軍起程日期並派遣員會剿豫捻各摺片據稱雷
正綰統帶頭隊於五月十五日由廬郡起行多隆阿卽親督後隊
繼進撥餉十萬兩由襄陽一路解往並派歐陽正墉等統帶所部

分道進剿豫捻疏通驛路各等語與歷次所降諭旨符合具見該大臣等公忠體國不分畛域與僧格林沁曾國藩南北兼籌洵無愧心腹之寄覽奏實深欣悅見據英桂奏稱陝省竄匪已由河南澠池一帶回竄是陝省大股已退雷正綰入關後剿辦餘匪諒可漸次埽蕩多隆阿一軍由襄樊前進卽著探明陝省情形如可無須入關卽於北路適中之地扼紮以防捻逆北犯兼可將由陝回竄豫境之匪就近會同豫軍分路擊截盡殲醜類歐陽正塘等軍卽飭分投進剿信陽等處以清豫捻並著鄭元善酌派兵勇會同楚軍痛剿其脅從各圩分別解散以孤賊勢前諭官文等飭令金國琛迅速赴陝卽著派員接辦鄖西防務迅催入陝聽候委用整頓營伍以保關陝重地不至賊匪任意往來逆匪由陝回竄已至澠池一帶陝省旣無一兵追剿而豫省亦未見派兵迎擊不知該

撫等所司何事英桂派兵渡河截殺尙屬認真見與東灘渡僅隔一河仍飭和昌等加意嚴防毋許稍涉大意致有疏失鄭元善前派楊飛熊一軍入關會剿該逆已由小路東竄楊飛熊何以不探賊所向迎頭截擊若賊匪不由洛陽回竄恐由孟津一帶竄擾開封等處卽著鄭元善一面飭令河北鎮帶兵堵截毋任東竄一面派兵由嵩洛迎剿使其被創而歸不至再萌西竄之志至多隆阿等軍餉昨據瑛柴奏稱已籌餉迎解北路得此重兵則山陝均免防堵之費英桂豈得膜視著懷遵前旨迅速籌解毋致缺誤將此由六百里各諭令知之○諭慶端奏攻剿松陽踞逆獲勝並布置溫州防剿情形一摺據稱松陽逆匪分五股將遂昌等處要路掘斷扼守堅拒經林文察等連日剿擊復經張銓慶激勸民團曾元福領隊會剿斬馘數千惟溫州瑞安各路賊黨日多探聞侍逆已

竄入溫界等語前因溫州軍情喫緊疊經諭令慶端與左宗棠會商勦辦力固閩省門戶僞侍逆前經左宗棠擊敗回竄金華見既探有竄溫之信卽著慶端督飭道員曾憲德等嚴行戒備副將吳鴻源師船抵溫卽令沿江扼擊以保溫閩其宣平賊勢著飭林文察等偵探明確分道進攻將松陽迅速攻克另片奏已革提督陳世章親督布興有等攻勦定海賊匪獲勝並官軍與外國師船克復甯波府城等語並據總理各國事務衙門奏收復甯郡張景渠等帶同水師阿伯前往阿伯一員本係何名見充何職慶端所奏署遊擊布興有是否卽阿伯其人著左宗棠查明具奏將此由六百里諭令知之○添調吉林等處壯丁五百名赴湖北勦賊○甲辰諭議政王軍機大臣等駱秉章奏嚴防滇練入川並訪查雲南近日情形一摺覽奏均悉林自清擁眾入川該督已於敘州一路

嚴密防範並在川滇交界張貼告示曉諭解散如可散其練眾僅存林自清一人或畱於川省勦賊或由張亮基等帶回滇省如竟抗不遵旨恃眾橫行卽飭各路痛加勦洗就地殲除勿稍姑息至所稱石逆一股經唐友耕等追剿李逆一股被湘果各營圍剿與卯逆均極窮蹙其詳細情形仍著查明具奏其鶴遊坪周逆一股及前竄川東各股滇匪自新甯克復墊江解圍後久未據該督奏報見在渝涪以下江路及夔萬一帶有無賊蹤並見辦情形均著迅速馳奏以慰廑念潘鐸到川計已月餘何以尙未前進本日據奏川陝山西宜設關守險而於滇省軍務地方曾未之及舍己芸人殊屬不知緩急著卽會同張亮基節節前進毋再遷延致干重咎四川軍務未平亦藉捐輸接濟該署督請於省城設局勸捐恐於滇事無補轉於川省有礙瀘州一帶賊勢已鬆所有雲南委員

仍令專在瀘州勸辦以免紛擾又據潘鐸奏陝西四川皆有險之區請飭該省督撫將應行設關之處擇要辦理等語著駱秉章酌量妥辦將此由六百里各諭令知之○諭據總理各國事務衙門奏稱接據法國照會內稱貴州提督田興恕起意凌辱教人去年屢次帶兵攻擊貴陽等處天主堂並派團務道趙畏三等往青巖等處攻壞學堂將該處習教張如洋等並不審問卽行處斬何冠英與田興恕有致府縣公信內云驅逐教人並藉故處之以法本年正月間開州夾沙龍地方因偏脅教人共祭龍鐙知州戴鹿芝將傳教人文乃耳及中國人吳貞相等拏去用極刑處死仍派團首接尋奉教之人拏獲嚴辦見署巡撫韓超又不將和約張貼知府多文知州戴鹿芝語言悖妄駭人聽聞請飭駱秉章等派員密查各等語人命至重卽使傳習天主教而其人並未犯法亦何得

不加審問遽行斬決田興恕本屬武夫或不能無鹵莽之處戴鹿芝素稱循吏何以忽有是舉韓超不將和約張貼何冠英有驅逐天主教人之信是否均有其事多文等口出狂悖之語是否係法國傳教人及中國之習教者捏造激怒之詞抑或實係不知檢點信口而道著賂秉章勞崇光分派滿漢慎密妥靠大員前往貴州訪查確實卽行覆奏務飭派往之員詳細查明秉公聲覆斷不可一字含混稍涉偏袒○先是欽差大臣曾國藩等遵旨議覆移建安徽省城並添設長江水師各員缺命議政王軍機大臣會同部臣議奏至是奏安慶地據形勝足資控制應如所請將省城移建以復舊制所請專設長江水師提督深得古人欲固東南必先守江之意應如所請添設提督一員駐紮蕪湖其總兵副參以至于千把應設幾缺暨分汛修艦各事宜仍令該督等體察情形熟籌妥

議至所需俸薪口糧俟該督報部覈定後飭由安徽省藩庫開支並令將舊有船隻礮位數目造冊報部以備稽覈從之○乙巳諭內閣鄭元善奏汝州團練謀叛經官軍掩捕殲斃首逆一摺汝州西鄉團練李瞻由舉人分發山西知縣乞假回籍借名辦團自號瞻王又號汝南王盤踞樊古寨地方分遣其黨王漢圍攻張寨其附近之朱寨陳寨並相勾結同謀不軌經鄭元善派令楊飛熊帶兵馳往直抵該逆踞寨李瞻膽敢開礮抗拒楊飛熊揮軍前進各良團兩面夾攻其內應之武生樊及銘乘機奪開寨門官軍蜂擁直入該逆率死黨狂奔楊飛熊分路跟追將李瞻矛刺落馬立時斫斃並分軍解張寨之圍其陳朱各寨黨與亦均乘夜遁逸地方一律安堵逆練李瞻以在籍職官輒敢謀爲不軌較之無知愚民尤爲罪大惡極此次楊飛熊乘賊初起督軍勦辦埽穴擒渠立

時撲滅辦理甚爲迅速仍著鄭元善飭令該地方官迅將在逃餘匪王漢等嚴拏務獲毋任漏網在事出力各員弁著准其酌保數員奏請獎敘○廣湖南巴陵縣學額五名安福四名甯鄉祁陽新化臨湘各三名新甯二名湘鄉安化茶陵衡山安仁道州龍陽辰溪溆浦澧州石門慈利各一名○予安徽陣亡知縣褚振遠等祭葬世職○河南巡撫鄭元善奏遵旨將逆首陳玉城在河南延津縣凌遲處死並傳首楚皖各營報聞○丙午諭議政王軍機大臣等袁甲三奏官軍乘間渡江奪回南岸要隘並會合上游水師共攻九洑洲力圖掃蕩一摺據稱九洑洲對江南岸石埠橋龍潭等處賊壘均與九洑洲呼吸相通李世忠密派隊伍由六合乘間渡江水陸並進先後將石埠橋龍潭東洋等要隘攻拔分別紮營以圖進取並會同王明山等師船設法圍攻九洑洲等語李世忠派

隊渡江連克要隘距金陵二十餘里各路軍威甚壯正宜長驅直
入力拔堅城鮑超一軍前已進攻甯國何以尙未克復著曾國藩
嚴飭該提督迅將甯郡踞匪盡力殲除以圖迅速攻克湖州已有
李楚材等軍進援鮑超卽可移兵高溧等縣與曾國荃等四面合
圍以杜蘇常逆匪援救之路則剿辦更易得手曾國藩近由安慶
撥給李世忠軍營火藥糧餉具見公忠體國不分畛域嗣後該提
督進止機宜卽著曾國藩就近節制龍潭東洋旣經官軍駐紮自
可扼金陵逆匪赴鎮之路馮子材魁玉惟當督飭兵勇遏截丹陽
等處股匪分道來撲李世忠所派渡江之參將曹玉梁黃國棟等
軍業已深入重地尤當慎益加慎斷不可稍有挫失著都興阿飛
飭黃彬等互相援應不得意存歧視或致疏虞袁甲三另片奏籌
剿金馬胡捻匪並撥兵前赴靈宿協剿及飭懷遠縣知縣英俊入

城各等語金馬胡賊巢著督飭總兵英秀等趕緊攻克毋任久踞
英俊業已入城如該練等仍存異志卽著痛加勦洗毋貽後患將
此由六百里各諭令知之○勝保奏臣攻克邢家灣賊圩一節先
因邢萬軍卽邢冠軍黨與眾多其藏匿處所搜查匪易是以當邢
正舉請命之時許以邢萬軍如能指引官軍盡搜伏匪助勦賊圩
卽當貸其一死不過暫示寬宥詎該匪陽奉陰違其土窖內藏匿
真賊二百餘名經臣親赴穗鋪始行搜獲正法並將賊巢房屋全
行焚毀當將邢萬軍及其父邢正舉其兄邢萬戰綁送潁州大營
卽日正法梟示此臣續辦邢圩賊巢之情形也又余安定信茂林
辦法一節余安定等於本年正月間運硝接濟粵逆一事實因其
母在廬州城內欲藉送硝爲名藉全母命旋因道梗未往迨臣抵
皖後前練歸正余安定亦隨同投誠臣面詢粵逆虛實情形均皆

直言不諱是以臣諭令帶罪立功余安定前於擒獲狗逆時實屬認真出力臣業已賞給六品軍功頂戴使之隨營自效其信茂林一名本係壽州行商並非粵逆雖受余安定託其運硝旋即中止似應一併免其治罪此臣辦理余安定一事之情形也又查明黃鳴鐸見在何處一節查黃鳴鐸前隨臣攻克正陽關保授今職守壽州時爲惡棍吉學盛黃彩等所挾勾捻入城以拒苗練後爲苗練拘畱老寨見臣親赴壽城已飭苗練將其交出該署鎮以專閫大員任聽捻匪出入城中以致起釁搆兵黃鳴鐸亦難辭咎若仍令遽赴新任殊失事理之平應如何酌予懲處並責令赴陝剿賊自效之處伏候訓示遵行此遵查黃鳴鐸一事之情形也至奉旨飭臣以馭苗剿捻爲己任臣於日內將壽州正陽布置妥協卽回潁州一面分兵會剿督苗練以擣豪耄老巢一面與鄭元善會合

料理汝甯所屬各股捻匪以期早殄皖豫寇氛又奏壽州惡棍吉學盛蠱役黃彩等無所不爲獨於苗練所屬各寨不得肆逞積憤成讎遂極力蠱惑本地官紳與苗爲難致遊擊李學會等七人被孫家泰等無端殺害當苗練圍城之時城中與之議和苗練卽行撤隊城中輒出兵躡之攻其營盤又令人潛攻下蔡殺掠多人失信構兵已非一次最後撫臣翁同書將徐立壯等正法且令博崇武尹善廷慶瑞三鎮紮營城外以阻攻苗之兵三鎮方令苗練撤隊間城上謂其不應與苗議和點然大礮將三營官兵轟斃多名此皆吉學盛等句結捻匪之所爲而翁同書身在城中不能禁止苗練偵知州城已爲惡棍捻匪所踞礮逐三鎮威劫撫臣是以公憤所激極力進攻在苗練不知投鼠之忌罪固難辭而推原召釁之由實係蠱役惡紳釀成此變袁甲三因事已決裂遂將錯就錯

而有主勦之說翁同書係深知此中曲折不能專咎苗沛霖故又有議撫之奏遂致前後兩歧此苗練攻圍壽州及事後議勦議撫之原委也刻下苗沛霖進勦捻巢壽州城內布置極爲周密察看壽州民情不惟與苗練兩無猜嫌且轉有悅服之意前任壽州知州任春和深得民心李續宜將其調署他處而委一帶勇出身之毛維翼署理在老廟集屯紮不敢進城臣前令副都統祥恩總兵馬陞部司譚玉龍帶兵赴壽州正陽駐紮以資鎮撫乃毛維翼與李續宜稟函捏稱馬陞譚玉龍攻克壽州李續宜惟輕信匪徒之言各路張貼告示聲言奉旨勦苗徒以大言恫喝轉致爲眾所輕復縱容吉學盛等散布流言句結捻匪幾至已定之人心又生反側今臣親赴壽州先諭苗憬開將駐壽苗練全行撤回老寨以備攻勦他處城中防守各事宜均交地方文武各官會同兵練駐守

免致無知之人援爲口實其在城及附近城廂各圩練丁酌畱三百名交李萬春管帶暫由副都統祥恩督率彈壓並據苗憬開將惡棍等充公田產七十五頃五十八畝五分房一千一百一十八間菜園九段一併交出聽候覈辦臣當卽札調毛維翼入城任事以便飭交辦理乃該員以李續宜批稟不令入城爲詞抗不聽調臣再四酌奪見在壽春鎮官兵因皖省已無藩庫無從請領餉銀此項產業卽可作爲屯田之費俟飭公正紳董議定章程再行分別飭交文武各官妥爲經理其匪首吉學盛黃彩等見又蠱惑毛維翼欲冒爲團練混入城中作亂且順李續宜意旨妄擬勦苗之策冀快私仇經該城鄉董紛紛控告臣已面屬副都統祥恩督同兵練設法捕勦以除惡類並請飭下李續宜就近嚴拏懲辦免致顛倒是非再爲所惑見在苗沛霖帶練勦捻幾於無日不戰臣軍

亦馳勦數月不敢告勞而李續宜株守六安不以勦賊爲事屢與
面商會勦捻巢竟不答覆茲復接捻首姜台凌投誠稟函內稱李
續宜又有句結勦苗之事不敢不據實密陳又奏據河南巡撫鄭
元善咨稱陳大瀋張鳳林等捻眾猖獗商髮逆又竄入豫境官
軍與賊勢眾寡懸殊請撥馬步官兵馳赴項城會勦等語臣擬日
內馳赴太和調度一切卽當遴派得力將弁督帶馬步兵勇馳往
項城一帶相機攻勦以收夾擊之效或能抽身親往於汝甯勦辦
大局更有裨益 上諭苗沛霖誘擒陳玉城朝廷業經降旨准其
免罪予以自新節次寄諭李續宜相機辦理李續宜身爲皖撫苗
沛霖係其部民寬嚴賞罰李續宜惟當持以公平不可豫存成見
勝保惟當飭令苗沛霖循守李續宜法度至姜台凌具稟於勝保
以李續宜函諭渠等勦苗爲詞李續宜於苗沛霖順則撫之逆則

剿之斷不可假手此輩有失大體至勝保謂吉學盛等散布流言屬副都統祥恩督同兵練剿捕吉學盛等係李續宜部下之人勝保亦應會同李續宜查明原委分別辦理斷不可因意見不合輒與尋仇以致操戈於同室總之李續宜身爲皖撫安徽境內紳民均當聽其節制該紳民等不得藉口團練與該撫相抗拒使李續宜欲用撫而不能勝保所撫之眾亦應嚴加約束無使有受撫之名仍遂其盜賊之計大局所關和衷爲要儻事機決裂是非曲直朝廷自有權衡豈能少爲寬貸也勝保另片所稱派撥兵勇赴項城會剿或尙須抽身親往之處著酌量情形辦理將此由六百里各密諭知之○諭明誼奏起程前赴塔爾巴哈台會議定界事宜一摺卽著明誼等於馳抵塔爾巴哈台之後按照地圖妥爲剖辯以免任意侵占漫無限制所有北路分界事宜仍著錫霖幫同辦理

以專責成俟事竣後再行來京明誼於會議回旋時卽會同錫霖督飭委員等各於本境建立界牌鄂博將此由五百里各諭令知之○丁未諭內閣托明阿瑛榮等奏收復山陽縣城一摺山陽踞匪自潼關之賊敗竄勢極窮蹙經副將張維義等督率兵團進剿該匪卽時南竄當將山陽縣城收復仍著瑛榮督飭在事員弁迅將餘匪殲除毋畱餘孽○諭議政王軍機大臣等前因陝省軍務喫緊諭令多隆阿馳赴陝西督辦軍務嗣因竄陝匪徒陸續回竄復諭該將軍探賊所向迎頭截剿卽扼紮北路適中之地以防捻逆北犯茲據該將軍奏報起程日期並分起派兵入陝情形一摺此時陝省大股匪眾均已回竄雷正綰所部八營入關剿辦餘匪無難肅清本日據托明阿等奏潼關肅清山陽收復餘匪竄赴鄖西是何紹彩一軍正可在該處攻剿無需入陝多隆阿見赴鄂省

與官文會商進剿機宜卽著迅速由武昌進發仍遵前旨相機辦理至瑛燊等所稱藍薛二逆攻陷太平逼近陝南等語藍薛二逆係由何路竄入是否新起土匪薛逆係屬何名藍逆是否卽係藍大順著駱秉章查明具奏見在赴援陝省之兵均應調赴陝東防剿豫捻及本地回匪陝南兵甚空虛人情驚惶毫不足恃著駱秉章迅撥勁旅將太平縣城收復並杜其入陝之路毛震壽前已帶兵赴漢中見在行抵何處卽著駱秉章探明催令將漢中布置妥密分帶精兵赴省商同瑛燊辦理一切見在該省漢回互闢張芾爲臨潼回民賺畱是其搆覺情形已成急宜持平辦理著瑛燊於雷正綰毛震壽各軍到省後相機妥辦務宜解其仇隙使之各安生業斷不可惑於人言稍有偏倚致釀巨患將此由六百里各諭令知之○予陝西殉難知縣恆春等祭葬世職建祠○戊申諭內

開宗人府刑部奏遵議已革大員定擬罪名一摺此案已革葉爾羌參贊大臣宗室英蘊於伯克阿克拉依都等攤派回眾銀兩清還舊欠官項明知違例並不奏參又不禁止幾致釀成重案其於阿布都薩依提等聚眾一案亦不奏明辦理輒將該回犯等按照經典斬絞多名並違禁演戲迫奉旨明白回奏猶復摭詞掩飾種種不合實屬咎無可解英蘊著照該衙門所擬從重發往盛京效力贖罪並著伊犁將軍將該革員迅解來京交該衙門卽行起解○諭議政王軍機大臣等前因薛煥等覆查浙江通賊大員案內有續到上海之副將張威邦與林福祥等分住客店嗣因紳民等指稱形迹可疑該副將潛由吳淞口搭船赴江北當經密諭袁甲三都興阿於拏獲後卽解赴曾國藩軍營嚴審茲據都興阿密奏探聞張威邦於前數日由江上駛攜帶洋礮火藥到滁州已投效

於李世忠部下等語張威邦既未前往江北都興阿所探投效李世忠之事似屬可信其帶有洋礮火藥等件則形迹可疑是否真心投效或欲勾結弁兵內應均未可知著曾國藩袁甲三各派妥員密速查訪或卽札詢李世忠令其押赴曾國藩軍營聽候該大臣嚴行審訊如通賊屬實卽遵前旨一面奏聞一面正法林福祥恆起劉齊昂米興朝見在藏匿何處並可向其根究分別酌辦將此由六百里各密諭知之○諭沈葆楨奏查明教堂被毀自請嚴議一摺據稱法國傳教人初到江省行蹤叵測紳民不能無疑時節生童雲集眾情洶洶遂將教堂拆毀紳士夏姓等開傳各節經與南昌府知府王必達驗無左證業經咨請總理各國事務衙門辦理見在滋事之犯遠颺卽爲首爲從實係何人無從訪問自請交部嚴加議處等語此事見經總理各國事務衙門與法國使臣

商辦俟該衙門如何定議再咨行該撫辦理沈葆楨所請交部嚴議之處身任其咎自係爲權顧大局起見著俟總理各國事務衙門與之剖辯如何辦法再行酌定將此由四百里諭令知之○申嚴門禁○己酉諭議政王軍機大臣等譚廷襄奏南捻由徐東竄見飭防範並各路剿撫情形一摺南捻出巢竄至徐州屬景山地面旋向山前馬安一帶直撲運河南岸當經譚廷襄咨會德楞額派哈勒洪阿等兵移紮齊村色楞泰馬隊馳赴臺莊賊見沿河有備遁走其庫山等一帶捻匪亦向東南竄去見屆二麥成熟其由徐東竄自係志在擄糧仍著譚廷襄飭屬嚴防並咨會德楞額馬軍防剿兼施毋稍疏懈如今匪眾又復偷渡運河惟該撫是問僧格林沁大兵圍剿金樓巨捻將次攻克指日進擣蒙亳老巢東省沿邊羣匪鼠伏伺隙而動該撫尤當飭屬振厲兵團妥爲備豫毋

使匪黨得以乘間肆擾致令大兵有所牽顧昨據吳棠奏朱洲賊
圩攻破知該匪句結東省之潞支賊匪滋擾已飭龔羅倫等帶隊
越境圍攻譚廷襄並飭所屬文武會合吳棠所派之軍併力埽除
將此由五百里諭令知之○庚戌諭內閣徐宗幹奏請將被參之
司道各員分別解任革職訊辦等語福建布政使裕鐸署按察使
劉胡宸均著解任聽候查辦道員章琮知府胡斌著先行革職提
同各局員及書吏人等嚴訊究辦原任江西知府升授四川成綿
龍茂道鍾峻著江西四川等省各督撫飭令該員迅速前赴福建
歸案查辦在籍知州姚鏡圖著革職嚴行審訊務期水落石出毋
任狡展○諭議政王軍機大臣等官文等奏山陽踞賊竄撲鄖西
縣城催調各軍馳往剿辦並汝捻分竄桐泌等處派兵馳赴襄陽
防剿又據托明阿等奏後股川匪由太平竄入漢南急盼援師堵

勦又漢回互鬪驟難解散必須懾以兵威始可安撫請飭多隆阿何紹彩成明等兵星速來陝各摺片入陝逆眾竄犯鄖西雖經何紹彩等迎擊獲勝而兵力尙單城圍未解亟宜厚集兵力掃蕩逆氛金國琛勇丁據奏已陸續赴鄖著官文等迅催前進分道援勦並飭顏朝斌挑選勁旅前往會同勦洗毋稍遲誤前據多隆阿奏先派雷正綰等督帶馬步八營取道襄陽直入陝境著多隆阿嚴催該總兵趕緊馳赴商南山陽一帶扼要駐紮相機進勦並截賊回竄之路其穆圖善等八營卽著馳赴鄖西會合何紹彩等軍併力攻勦迅解城圍刻下漢中防堵正當喫緊而渭南等處漢回互相焚掠亟須該將軍統領大兵入關鎮撫多隆阿已由廬州兼程前進著卽迅速馳赴秦中以資彈壓毋以紆道致稽時日至汝捻陳大澣股匪竄擾唐縣平市逼近棗陽業經官文等飛催梁作楫

督勇赴襄會同防剿諒可無虞仍著官文等督飭歐陽正墉等軍迅速攻擣信陽一路以牽賊勢並著鄭元善調派汝防兵勇前往會剿務將信陽等處踞匪剋日殲除並不得令其向西北竄逸見在川匪鄧逆竄至黃官嶺藍薛二逆擾及太平縣城復由漁渡關闖入陝省定遠廳境若竟會合鄧逆則勢益披猖更難撲滅何紹彩等軍見因援剿鄖西急切不能赴陝著托明阿等迅催馬德昭前往漢中督同鄒學鏞等嚴密截剿迅解定遠之圍並嚴飭官兵實力堵禦毋令該匪竄越漢江蔓延爲患毛震壽業已起程著駱秉章飛催該藩司趕緊入陝會剿毋稍延誤陝南股匪該省兵力既不足以剿除而回漢仇殺又復不能妥爲彈壓瑛棨身任封疆必須竭力振作方爲不負委任吳振械前已奏報起程赴晉見今山西防務稍鬆吳振械著卽折回西安會同吳棨將漢回互關情

形籌商妥辦法解散毋得專待援師至漢回仇釁日深辦理更
形棘手張芾見在倉頭鎮是否尙被回民羈留卽著查明具奏其
成明所統京兵仍在蒲同一帶駐紮以防該逆北竄著英桂卽會
同該署提督妥爲布置並著英桂迅速知照吳振械折回陝省毋
稍延緩將此由六百里諭令知之○諭前據瑛棨張芾奏請將曹
澍鍾暫畱漢中督辦防剿事宜當經諭以曹澍鍾曾爲胡林翼奏
參性行卑鄙遇事巧詐豈能獨當一面所請著不准行茲據瑛棨
奏曹澍鍾官川臬時風節自持其任廣西巡撫任內正當石逆圍
攻省城該前撫並不以已丁母憂藉詞脫卸及解圍後仍卽奏請
終制亦不希冀奪情胡林翼因挾從前揭參之嫌始行彈劾所參
各節不足憑信等語胡林翼公忠體國中外咸知前參各節若非
確有所知豈肯遽行入奏而瑛棨則稱曹澍鍾服官中外著有功

效並以胡林翼爲徇私朝廷用人行政豈容是非混淆賢奸莫辨
駱秉章在湖南最久於廣西鄰省情形見聞必稔見在莅任川省
於曹澍鍾從前官聲人品尤易採訪著卽秉公確查據實覆奏原
摺著鈔給閱看將此諭令知之尋奏遵查曹澍鍾前在川省服官
聲名狼藉胡林翼劾其卑鄙巧詐自是確有所知報聞○諭徐宗
幹奏妥籌防務各摺片據奏溫郡擊賊獲勝各軍合攻處州青田
等處當可得手著嚴飭曾憲德等聯絡民團妥籌守禦至臺灣匪
徒尙踞彰化商艘不能通行各營臺勇聞變不無內顧誠恐別生
事端卽著徐宗幹飛飭曾玉明仍赴泉州統兵前往勦辦務期恩
威並用將該匪迅速平定以清臺境其粵省應解援浙餉銀由商
人劃兌一節粵省本有應協浙省之餉亦有欠解閩省之餉且各
該商人於各口均有應納稅項若概行匯借將來各省效尤難保

不致生輻輳所稱洋商向議湊借議定利息分期歸還其利息作如何計算其歸還時如何辦理著詳細具奏嗣後於餉需一切務當妥爲通籌期於無弊不得僅顧目前率行匯借致啟弊混之漸將此由五百里諭令知之尋奏匯借洋商銀兩議由閩粵兩海關稅項內分月扣還息銀在通省捐廉項下提補下部知之○諭據總理各國事務衙門奏稱復接法國照會請飭查詢各等語天主教弛禁和約本有專條自當彼此遵守田興恕初因勦辦賊匪誤未分別何以經總理衙門咨查之後而戴鹿芝仍有擅殺教士文乃耳等之事該知州素有循聲自應以愛民爲本豈可因其傳教殺害無辜嗣後黔省遇有傳教之人卽著與平民一體相待斷不可圖洩一時之憤有誤大局儻查有傳教人作奸犯科應行治罪者卽詳細奏聞候旨覈辦該撫等均係封疆大員當通籌大局安

爲辦理所有條約卽著韓超張貼用符原議如再有屬員任意妄殺傳教人等或將弁故意殺害以圖洩憤則是疏縱之罪不能再邀寬免也將此由六百里各諭令知之○命兵部尙書愛仁署都察院左都御史王茂蔭馳往山西查辦事件○辛亥曾國藩奏提督鮑超統率馬步各軍於四月二十五日由青陽拔隊前進甫抵青弋江謀報楊逆糾眾十餘萬堅守甯國府城洪逆一股屯聚團山圍犯蕪湖南陵等縣楊雄青一股踞紮寒亭獅子山分擾梅家店管家橋一帶以阻進兵之路鮑超知賊勢方盛乃於抱龍岡隔河布營潛治牆濠不遽出戰以懈賊心五月初四日先派劉玉堂等五營潛渡山岡分道設伏復飭周有勝等進薄寒亭誘賊出壘鮑超親督將士繞越翟村木瓜橋涉淺過河令總兵婁雲慶等分左右路聯絡繼進寒亭之賊方以周有勝等孤軍深入出巢猛鬪

瞥見左右兩路大軍掩至正在傍徨而附近村落中羣賊齊出接應數逾四萬鮑超令顏紹棠等騰蹕而入直擣中堅縱橫盪決明興等率馬隊鈔出管家橋宋國永等橫躍入陣衝賊數段山岡後伏兵齊出扼斷歸路唐仁廉擒僞順天安楊民青僞撫天福黎奉民於陣馬勝奎等乘勢搶過寒亭浮橋立毀護橋二壘賊匪負創驚潰我軍追殺二十餘里將寒亭管家橋梅家店至獅子山賊館數十處賊壘三十五座同時踏平斃賊六千有奇楊雄青糾合零匪遁回甯郡臣查甯國一城屏蔽蘇浙逆黨聚至二十萬之多臣深以兵單爲慮自有此捷而我軍節節進攻圍偏郡城亦漸有可乘之隙臣仍檄令速籌攻取上諭內閣逆匪楊輔青竄踞甯國府城分股屯聚團山寨亭等處經鮑超督飭將士奮勇進攻將各路賊館賊壘一律踏平斃賊六千有奇剿辦甚爲得手卽著鮑超

等迅速進剿攻克堅城盡殲醜類○曾國藩奏提督銜福建延平協副將陳由立前奉諭旨飭赴河南軍營當以圍攻青陽正緊經臣奏留鮑超軍營隨同進剿茲據鮑超呈稱該員留營後輒因上年有降補守備鄭陽和藉故告假私往湖南投效統帶多營之事相形見絀遂生歛望竟與儘先副將余大勝先後託病請假相率颺去請將陳由立余大勝鄭陽和奏參等情前來又臣疊准湖南撫臣毛鴻賓來咨已令鄭陽和帶勇千餘防守邊境河南撫臣鄭元善來函陳由立已行抵河南仍委令赴湘募勇三千是該員等任意違戾實屬大干軍令若不嚴行懲辦則此風一開以軍營爲傳舍之地以投效爲逋逃之藪流弊甚大應請旨將提督銜福建延平協副將陳由立儘先補用副將余大勝降補守備鄭陽和一併革職並請飭下湖南撫臣撤去鄭陽和帶勇差使查明陳由立

余大勝等均不許招勇立營不許逗畱境內派員押回皖南原營責令立功自贖 上諭副將陳由立等託故離營輒敢任意遠颺別謀投效實屬大干軍令提督銜記名總兵福建延平協副將陳由立記名總兵儘先副將余大勝記名總兵降補守備鄭陽和著一併革職並著毛鴻賓撤去鄭陽和帶勇差使查明陳由立余大勝等見在何處派員押送留國藩軍營以杜效尤而肅軍律○留國藩彭玉麟奏藩司留國荃督率所部乘勝攻破周村卡進紮江甯鎮之板橋地方五月初一日留國荃引軍馳抵秣陵關平毀賊壘奮勇攻擊守關賊酋舉眾獻關收降四百餘人餘悉解散仍嚴飭前隊進大定坊繞出三汊河後緊逼大勝關初二日派兵設伏進攻賊匪乘夜縱火棄巢而遁官軍追殺數百名立將大勝關三汊河兩壘攻克時彭玉麟駐師金柱關聞留國荃懸軍深入亟約

提督王明山率水師各營渡江策應駛近頭關適曾國荃整旅而
來薄關紮營各軍排礮轟擊水陸夾攻立拔頭關臣彭玉麟會同
王明山親督各營直逼江心洲飛礮入壘轉戰移時兵勇逼近賊
壘縱火焚燒我軍齊呼躍入賊眾撲火溺水屍滿江流所有賊船
百餘號礮數百尊悉行奪獲師船乘勝奪取蒲包洲遂泊金陵之
護城河口曾國荃率隊直逼雨花臺紮營距城不及四里賊數
來窺犯輒行擊退臣等查金陵城大而堅未易猝拔此次水陸兵
勇僅二萬人雖沿江重險先後攻奪尙難遽爲仰攻之策應俟曾
貞幹六營多隆阿一軍增調到防再籌大舉又奏近日軍情自僞
輔王楊逆退回甯國後浙東賊勢稍鬆江西邊防亦固僞侍王尙
在衢州一帶左宗棠分兵畱守開化馬金街以固徽婺之防親率
各營赴衢勦辦劉培元所部已由玉山入浙仍俟蔣益澧大隊到

防方可由衢嚴分道而進鮑超一軍攻克寒亭等處賊壘移營進紮尙距甯郡十餘里頃探聞湖州於五月初三日失守鮑超以甯國賊勢太重萬難抽兵赴援李楚材由間道馳赴亦因梗阻未能趕到臣一聞此信愧憤曷勝俟探明確實續行具奏曾國荃一軍由太平下偏金陵本得建瓴之勢惟兵力不敷僅屯紮南面一隅洪逆似無懼之情臣擬調多隆阿一軍前往會剿乘此軍威極盛四面猛攻當可得手此時各省多故處處須兵臣愚謂宜以全力會辦江南先復財賦之區則各省可期次第剿辦上諭議政王軍機大臣等曾國藩等奏官軍水陸並進疊復要隘圍偏金陵一摺據稱水陸官軍連克秣陵關大勝關三汊河頭關江心洲蒲包洲等要隘泊護城河紮雨花臺距城不及四里該逆恃其城大而堅毫無懼應俟曾貞幹多隆阿兩軍增調到防再籌大舉自

因水陸兵數不敷分布非添調勁旅四面合圍不足以制其死命
惟多隆阿一軍前經調赴陝西剿辦竄匪該將軍已由廬州兼程
前進見在川匪竄擾漢南其圍撲鄖西之賊亦須防其回竄且同
華一帶漢回仇殺迄未休息必得該將軍統率大兵入關一行藉
資鎮撫著多隆阿仍遵前旨迅催雷正綰等軍星速赴陝該將軍
亦卽徑赴秦中如漢回互鬪萬難解散卽著會同瑛棨分別曲直
其頑梗不遵教化者毋論是漢是回卽著督兵進剿漢不得借
助回民剿回亦不得藉資漢練免致以偏向貽患將來多隆阿俟
陝南軍務廓清後卽行統率全部馳赴江南會剿以成大功惟見
在圍攻金陵兵力究嫌單薄所有多隆阿畱防廬郡之兵仍著曾
國藩察看情形酌量調赴金陵以厚兵力能超進攻甯國大獲勝
仗一俟甯郡克復卽可由廣德進至高淳溧水節節掃蕩會合攻

勦金陵見在楚師之抵金陵者數僅二萬李世忠渡江之勇都興
阿登陸之兵爲數亦屬無多曾國藩等務當分飭各營將領愼益
加愼切不可輕易進攻設有緩急仍須酌量添兵協助湖郡官紳
趙景賢等嬰城固守半年有餘可謂殫竭心力卒以援絕而陷殊
堪惋惜其失守情形及趙景賢等下落著曾國藩左宗棠迅速查
明具奏曾國藩前派由間道援湖之李楚材一軍究在何處並著
查明調撥劉培元所部已由玉山入浙著左宗棠迅將上游被陷
郡縣趕緊攻克毋得專待蔣益澧來浙轉致稽遲刻下左宗棠宜
如何進兵勦辦卽將布置情形迅速奏聞本日有人奏福建臬司
張運蘭所部五千人驍勇善戰若令駐紮浦城籌辦防務呼應較
靈等語著曾國藩於克復甯國後察看如果徽郡防務稍鬆卽行
酌量調撥以顧閩疆將此由六百里各諭令知之○勝保奏臣攻

克邢圩後聞西路大股賊匪有回竄周家口之信當派副都統烏勒興阿等帶隊前往迎剿該逆大股皆麇集陳郡以西之高廟一帶該副都統等於四月二十日整隊直抵賊營施放槍箭賊匪分路衝撲我軍四面兜截並分兵從後來擊賊眾大亂斃賊數百名追奔七十餘里餘匪遁歸老巢五月初間捻首王懷義雷彥劉狗等股萬餘人復由亳境之雙溝集三岔口一帶擾攻太和之倪邱集商家店等處臣卽派烏勒興阿等馳往截擊初八日行至雙溝地方逆眾悉力來撲我兵屹立不動惟以槍礮轟擊斃賊千餘名追殺二十餘里逆匪敗歸老巢臣將大隊甫經撤回太和據西路探報由豫境南召盧氏等處敗竄捻匪於沙河南岸避兵而行欲乘間回巢臣復派官兵於十一日馳抵太和之甄橋集一帶截擊斃賊數百名奪獲器械馬匹輜重無數餘賊向沈邱西南銅陽城

一帶奔竄與新蔡捻匪合股臣於十五日由壽旋潁適官兵攻剿板橋集賊巢正當喫緊詎張逆糾約各股捻眾並髮逆馬融和率悍賊二三萬來撲江口集營盤聲言分股竄撲西北臣派副都統常海等馳赴江口集會合夾擊十七日各軍四面環攻將逆眾全數擊退斃賊甚多臣卽於十九日回軍太和見在苗練分攻板橋集一帶賊匪一俟得手卽令滾營前進直擣江家集楚店集雉河集老巢惟捻勢甚重賊巢林立非厚集兵力不能剋期殄滅臣原以五月爲期督師進擣捻巢止以豫境賊勢鴟張西南敗匪見聚新蔡銅陽一帶臣軍深入被賊邀截後路似非勝算是以先其所急遵旨親統馬步五千先赴豫境沈項督剿汝項一帶若能漸就肅清則豫軍亦免爲所牽掣更可均出臣分布東西再得李續宜籌撥楚軍數千由潁北追剿臣督大軍由太和而東節節掃

蕩加以僧格林沁在歸德宿州一帶布置嚴密力杜殘賊北逸臣設法圖維總期數月內殄盡捻氛以除巨患 上諭勝保自攻克邢圩後分兵進剿高廟等處疊次獲捷惟蒙亳捻巢林立一經深入恐被邀截後路自係實在情形見在該大臣親統馬兵五千名先赴沈項督剿著卽力籌掃蕩以清豫省門戶鄭元善已赴汝甯未暇兼顧沈項若勝保駐紮該處於汝郡軍務甚有裨益該大臣剋期滅捻志甚可嘉惟攻心爲上而張落刑實爲捻逆巨魁必當先籌剿除則羣捻聞風喪膽著勝保迅圖進剿雉河集老巢擒獲張逆以快人心將此由六百里諭令知之○諭英桂奏逆匪退竄東南晉境肅清一摺據稱見在茅津東灘等渡已無賊蹤仍責成駐守官兵嚴防回竄並探明賊如同巢卽將防兵酌量裁撤等語逆匪垂涎晉省已非一日見在飽掠遠颺並未大受懲創所請裁

撤防兵雖爲節省餉糈起見但恐該逆乘虛回竄設有疏虞關繫匪輕仍著飭令和昌等督飭防兵實力堵禦勿稍疏懈切不可因賊勢較鬆稍涉大意至同州等處回匪愈聚愈眾該處逼近晉疆深虞波及尤難保晉省回民不被勾結著英桂督飭各該管地方文武員弁豫加保範弭釁無形不可稍有疏失將此由六百里諭令知之○諭沈兆霖奏勦辦撤匪情形並調兵協勦川匪各摺片據稱戎循兩屬撤匪經官軍分別勦辦疊獲勝仗先後斃匪二千數百名見探該匪甚爲窮蹙惟頑梗如故雖遞呈乞求申理而詞意不馴擬再待半月若無就撫機會惟有畱兵駐守作以防爲勦之策陸續撤退各兵等語該署督此次辦理撤匪原係力矯從前諸弊本期勦撫兼施使該匪稍懼兵威因而就撫庶可一勞永逸乃疊經懲創尚未帖耳受撫自當乘此匪勢窮蹙之際相機辦理

見既出示購拏馬尒三並開導餘匪投誠該撒拉既遞呈乞求申
理諒亦不能日久相持著卽乘機妥辦固不可蹈上年覆轍亦不
可稍損威望爲該匪所輕該署督擬半月後回省自因餉需支絀
恐誤大局起見惟該匪善於窺我虛實總宜察度情形示以鎮靜
一面嚴飭將士實力攻勦待其窮而思轉如果辦理已有端緒該
署督卽不必仍駐湟中亦屬可行昨據瑛棨奏馬德昭已抵陝省
惟所帶止有數十人著該署督卽將其所帶之兵催令趕緊馳赴
陝省漢中一帶歸其調用勦辦川匪毋再遲延將此由五百里諭
令知之○諭前因匪首劉占考更名劉效忠率眾投誠其家屬經
官兵拏獲押解曹州監禁曾諭令俟劉效忠勦賊立功後再將其
家屬給還茲據勝保奏劉效忠隨赴皖省以來屢次打仗殺賊甚
爲出力請將其家屬釋放等語劉效忠既據勝保奏稱勦賊立功

已有實據卽著僧格林沁轉飭曹州府將劉效忠家屬釋放妥爲安置毋令失所仍著責成地方官隨時稽察防範毋令滋事將此諭令知之○予安徽陣亡遊擊鄭永福等祭葬世職○是月緩徵河南杞縣等二十九縣廣東樂昌等六縣被擾額賦